

欽定遼史

卷七十

四十九

十六

遼史卷七十四

元中書右丞相總裁脫脫等修

列傳第四

耶律敵刺

蕭痕篤

康默記

延壽

韓延徽

德樞 紹芳

紹勳 資讓

韓知古

匡嗣

德原

德凝

耶律敵刺字合魯隱遙輦鮮質可汗之子太祖踐阼與
敵穩海里同心輔政太祖知其忠實命掌禮儀且誘以
軍事後以平內亂功代轄里爲奚六部吐里卒敵刺善
騎射頗好禮文

蕭痕篤字元里軫迭刺部人其先相遙輦氏痕篤少慷慨以才能自任早隸太祖帳下數從征討旣踐阼除北府宰相痕篤事親孝爲政尙寬簡

康默記本名照少爲薊州衙校太祖侵薊州得之愛其材隸麾下一切蕃漢相涉事屬默記折衷之悉合上意時諸部新附文法未備默記推析律意論決重輕不差毫釐罹禁網者人人自以爲不寃頃之拜左尙書神冊三年始建都默記董役人咸勸趨百日而訖事五年爲皇都夷离畢會太祖出師居庸關命默記將漢軍進逼長蘆水寨俘馘甚衆天贊四年親征渤海默記與韓知

古從後大譴譔叛命諸將攻之默記分薄東門率驍勇先登既拔與韓延徽下長嶺府軍還已下城邑多叛默記與阿古只平之既破回跋城歸營太祖山陵畢卒佐命功臣其一也孫延壽字胤昌少儻謂其所親大丈夫爲將當效節邊垂馬革裹屍景宗特授千牛衛大將軍宋人攻南京諸將旣成列延壽獨奮擊陣前敵遂大潰以功遙授保大軍節度使乾寧三年卒

韓延徽字藏明幽州安次人父夢殷累官薊儒順三州刺史延徽少英燕帥劉仁恭奇之召爲幽都府文學平州錄事參軍同馮道祇候院授幽州觀察度支使後守

光爲帥延徽來聘太祖怒其不屈留之述律后諫曰彼秉節弗撓賢者也柰何困辱之太祖召與語合上意立命參軍事攻党項室韋服諸部落延徽之籌居多乃請樹城郭分市里以居漢人之降者又爲定配偶教墾藝以生養之以故逃亡者少居久之慨然懷其鄉里賦詩見意遂亡歸唐已而與他將王緘有隙懼及難乃省親幽州匿故人王德明舍德明問所適延徽曰吾將復走契丹德明不以爲然延徽笑曰彼失我如失左右手其見我必喜旣至太祖問故延徽曰忘親非孝棄君非忠臣雖挺身逃臣心在陛下臣是以復來上大悅賜名曰

匣列匣列遼言復來也卽命爲守政事令崇文館大學士中外事悉令參決天贊四年從征渤海大誣譏乞降旣而復叛與諸將破其城以功拜左僕射又與康默記攻長嶺府拔之師還太祖崩哀動左右太宗朝封魯國公仍爲政事令使晉還改南京三司使世宗朝遷南府宰相建政事省設張理具稱盡力吏天祿三年六月河東使請行冊禮帝召延徽定其制延徽奏一遵太宗冊晉帝禮從之應歷中致事子德樞鎮東平詔許每歲東歸省九年卒年七十八上聞震悼贈尙書令葬幽州之魯郭世爲崇文令公初延徽南奔太祖夢白鶴自帳中

出比還復入帳中詰旦謂侍臣曰延徽至矣已而果然
太祖初元庶事草創凡營都邑建宮殿正君臣定名分
法度并并延徽力也爲佐命功臣之一子德樞德樞年
甫十五太宗見之謂延徽曰是兒卿家之福朕國之寶
真英物也未冠守左羽林大將軍遷特進太尉時漢人
降與轉徙者多寓東平丁歲苗饑饉疾癘德樞請往撫
字之授遼興軍節度使下車整紛剔蠹恩煦信乎勸農
桑興教化期月民獲蘇息入爲南院宣徽使遙授天平
軍節度使平灤營三州管內觀察處置等使門下平章
事已而加開府儀同三司行侍中封趙國公保寧元年

卒孫紹勲紹芳紹勲仕至東京戶部使會大延琳叛被
執辭不屈賊以鋸解之憤罵至死紹芳重熙間參知政
事加兼侍中時廷議征李元昊力諫不聽出爲廣德軍
節度使聞敗嘔血卒孫資讓壽隆初拜中書侍郎平章
事會宋徽宗嗣位遣使來報有司按籍有登寶位文坐
是出爲崇義軍節度使改鎮遼興卒

韓知古薊州玉田人善謀有識量太祖平薊時知古六
歲爲淳欽皇后兄欲穩所得后來嬪知古從焉未得省
見久之負其有怏怏不得志挺身逃庸保以供資用其
子匡嗣得親近太祖因間言太祖召見與語賢之命參

通史卷之十四 列傳
謀議神冊初遙授彰武軍節度使久之信任益篤總知
漢兒司事兼主諸國禮儀時儀法疏闊知古援據故典
參酌國俗與漢儀雜就之使國人易知而行頃之拜左
僕射與康默記將漢軍征渤海有功遷中書令天顯中
卒爲佐命功臣之一子匡嗣

匡嗣以善醫直長樂宮皇后視之猶子應歷十年爲太
祖廟詳穩後宋王喜隱謀叛辭引匡嗣上置不問初景
宗在藩邸善匡嗣卽位拜上京留守頃之王燕改南京
留守保寧末以留守攝樞密使時耶律虎古使宋還言
宋人必取河東合先事以爲備匡嗣詆之白寧有是已

而宋人果取太原乘勝逼燕匡嗣與南府宰相沙惕隱
休哥侵宋軍于滿城方陣宋人請降匡嗣欲納之休哥
曰彼軍氣甚銳疑誘我也可整頓士卒以禦匡嗣不聽
俄而宋軍鼓譟薄我衆蹙踐塵起漲天匡嗣倉卒諭諸
將無當其鋒衆旣奔遇伏兵扼要路匡嗣棄旗鼓遁其
衆走易州山獨休哥收所棄兵械全軍還帝怒匡嗣數
之曰違爾衆謀深入敵境爾罪一也號令不肅行伍不
整爾罪二也棄我師旅挺身鼠竄爾罪三也偵候失機
守禦弗備爾罪四也捐棄旗鼓損威辱國爾罪五也促
令誅之皇后引諸內戚徐爲開解上重違其請良久威

通鑑卷之四十四 魏傳
五
稍霽乃杖而免之既而遙授晉昌軍節度使乾亨二年
改西南面招討使卒睿智皇后聞之遣使臨弔賻贈甚
厚後追贈尚書令五子德源德讓後賜名隆運德威德
崇德疑德源德凝附傳餘各有傳

德源性愚而貪早侍景宗邸及卽位列近侍統和間官
崇義興國二軍節度使加檢校太師以賄名德讓貽書
諫之終不悛以故論者少之後加同政事門下平章事
遙攝保寧軍節度使乾亨初卒

德凝謙遜廉謹保寧中遷護軍司徒開泰中累遷護衛
太保都宮使崇義軍節度使移鎮廣德秩滿部民請留

從之改西南面招討使党項隆益答叛平之遷大同軍
節度使卒于官子郭三終天德軍節度使孫高家奴終
南院宣徽使高十終遼興軍節度使

遼史卷七十四

遼史卷七十五

元中書右丞相總裁脫脫等修

列傳第五

耶律靚烈

羽之

耶律鐸臻

古

突呂不

王郁

耶律圖魯窘

耶律靚烈字兀里軫六院部蒲古只夷離堇之後父偶思亦爲夷離堇初太祖爲于越時靚烈以謹愿寬恕見器使旣卽位兄曷魯典宿衛以故靚烈入侍帷幄與聞政事神冊三年曷魯薨命靚烈爲迭刺部夷離堇屬以南方事會討党項皇太子爲先鋒靚烈副之軍至天德

通鑑卷一百一十五 列傳
雲內分道竝進覲烈率偏師渡河力戰斬獲甚衆天贊
初析迭刺部爲北南院羅夷离堇時大元帥率師由古
北口畧燕地覲烈狗山西所至城堡皆下太祖嘉其功
錫賚甚厚從伐渤海拔扶餘城留覲烈與寅底石守之
天顯二年留守南京十年卒年五十六弟羽之

羽之小字兀里字寅底哂幼豪爽不羣長嗜學通諸部
語太祖經營之初多預軍謀天顯元年渤海平立皇太
子爲東丹王以羽之爲中臺省右次相時人心未安左
大相迭刺不踰月薨羽之莅事勤恪威信竝行太宗卽
位上表曰我大聖天皇始有東土擇賢輔以撫斯民不

以臣愚而任之國家利害敢不以聞渤海昔畏南朝阻險自衛居忽汗城今去上京遼邈旣不爲用又不罷戍果何爲哉先帝因彼離心乘釁而動故不戰而克天授人與彼一時也遺種寢以蕃息今居遠境恐爲後患梁水之地乃其故鄉地衍土沃有木鐵鹽魚之利乘其微弱徙還其民萬世長策也彼得故鄉又獲木鐵鹽魚之饒必安居樂業然後選徒以翼吾左突厥党項室韋夾輔吾右可以坐制南邦混一天下成聖祖未集之功貽後世無疆之福表奏帝嘉納之是歲詔徙東丹國民於梁水時稱其善人皇王奔唐羽之鎮撫國人一切如故

以功加守太傅遷中臺省左相會同初以冊禮赴闕加特進表奏左次相渤海蘇貪墨不法事卒子和里終東京留守

耶律鐸臻字敵輦六院部人祖蒲古只遙輦氏時再爲本部夷離堇耶律狠德等旣害玄祖暴橫益肆蒲古只以計誘其黨悉誅夷之鐸臻幼有志節太祖爲于越常居左右後卽位梁人遣使求轆軸材太祖難之鐸臻曰梁名求材實覘吾輕重宜答曰材之所生必深山窮谷有神司之須白鼻赤驢禱祠然後可伐如此則其語自塞矣已而果然天贊三年將伐渤海鐸臻諫曰陛下先

事渤海則西夏必躡吾後請先西討庶無後顧憂太祖從之及淳欽皇后稱制惡鐸臻囚之誓曰鐵鎖朽當釋汝既而召之使者欲去鎖鐸辭曰鐵未朽可釋乎后聞嘉歎趣召釋之天顯二年卒弟古突呂不

古字涅刺昆初名霞馬葛太祖爲于越嘗從畧地山右會李克用於雲州古侍克用異之曰是兒骨相非常不宜使在左右以故太祖頗忌之時方西討諸弟亂作聞變太祖問古與否曰無喜曰吾無患矣趣召古議古陳殄滅之策後皆如言以故錫賚甚厚神冊未南伐以古佐右皮室詳穩老古與唐兵戰于雲碧店老古中流矢

傷甚太祖疑古陰害之古知上意跪曰陛下疑臣恥居
老古麾下耶及今老古在請遣使問之太祖使問老古
對曰臣於古無可疑者上意乃釋老古卒遂以古爲右
皮室詳穩既卒太祖謂左右曰古死猶長松自倒非吾
伐之也

突呂不字鐸袞幼聰敏嗜學事太祖見器重及製契丹
大字突呂不贊成爲多未幾爲文班林牙領國子博士
知制誥明年受詔撰決獄法太祖畧燕詔與皇太子及
王郁攻定州師還至順州幽州馬步軍指揮使王千率
衆來襲突呂不射其馬躡擒之天贊二年皇子堯骨爲

大元帥突呂不爲副旣克平州進軍燕趙攻下曲陽北平至易州易人來拒踰濠而陣李景章出降言城中人無鬪志大元帥將修攻具突呂不諫曰我師遠來人馬疲憊勢不可久留乃止軍還大元帥以其謀聞太祖大悅賜賚優渥車駕西征突呂不與大元帥爲先鋒伐党項有功太祖犒師水精山大元帥東歸突呂不留屯西南部復討党項多獲而還太祖東伐大譴譔降而復叛攻之突呂不先登渤海平承詔銘太祖功德于永興殿壁班師已下州郡往往復叛突呂不從大元帥攻破之淳欽皇后稱制有飛語中傷者后怒突呂不懼而亡太

通鑑卷一百一十五 及傳
宗知其無罪召還天顯三年討烏古部俘獲甚衆伐唐以突呂不爲左翼攻唐軍霞沙寨降之十一年送晉主石敬瑭入洛及大冊突呂不總禮儀事加特進檢校太尉會同五年卒

王郁京兆萬年人唐義武軍節度使處直之孽子伯父處存鎮義武卒三軍推其子郜襲處直爲都知兵馬使光化三年梁王朱全忠攻定州郜遣處直拒于沙河兵敗入城逐郜郜奔太原亂兵推處直爲留後遣人請事梁王梁與晉王克用絕好表處直爲義武軍節度使初郜之亡也郁從之晉王克用妻以女用爲新州防禦使

處直料晉必討張文禮鎮亡則定不獨存益自疑陰使
郁北導契丹入塞以牽晉兵且許爲嗣郁自奔晉常恐
失父心得使大喜神冊六年奉表送款舉室來降太祖
以爲養子未幾郁兄都囚父自爲留後帝遣郁從皇太
子討之至定州都堅壁不出掠居民而還明年從皇太
子攻鎮州遇唐兵于定州破之天贊二年秋郁及阿古
只畧地燕趙攻下磁窯務從太祖平渤海戰有功加同
政事門下平章事改崇義軍節度使太祖崩郁與妻會
葬其妻泣訴於淳欽皇后求歸鄉國許之郁奏曰臣本
唐主之婿王已被弑此行夫妻豈能相保願常侍太后

通鑑卷一百一十五 齊紀
五
后喜曰漢人中惟王郎最忠孝以太祖嘗與李克用約
爲兄弟故也尋加政事令還宜州卒

耶律圖魯窘字阿魯隱肅祖子治脊之孫勇而有謀畧
太宗立晉之役其父敵魯古爲五院夷离堇歿于兵帝
卽以其職授圖魯窘會同元年改北院大王嘗屏左右
與議大事占對合上意從討石重貴杜重威擁十萬餘
衆拒滹沱橋力戰數日不得進帝曰兩軍爭渡人馬疲
矣計安出諸將請緩師爲後圖帝然之圖魯窘厲色進
曰臣愚竊以爲陛下樂於安逸則謹守四境可也旣欲
擴大疆宇出師遠攻詎能無厯聖慮若中路而止適爲

賊利則必陷南京夷屬邑若此則爭戰未已吾民無奠
枕之期矣且彼步我騎何慮不克况漢人足力弱而行
緩如選輕銳騎先絕其餉道則事蔑不濟矣帝喜曰國
強則其人賢海巨則其魚大於是塞其餉道數出師以
牽撓其勢重威果降如言以功獲賜甚厚明年春卒軍
中

論曰神冊初元將相大臣拔起風塵之中翼扶王運以
任職取名者固一時之材亦由太祖推誠御下不任獨
斷用能總攬羣策而爲之用歟其投天隙而列功庸至
有心腹耳目手足之諭豈偶然哉討党項走敵魯平刺

葛定渤海功亦偉矣若默記治獄不寃頗得持論不撓
延徽立經陳紀紹勲秉節而死圖魯窘料敵制勝豈器
博者無近用道長者其功遠歟稱爲佐命固宜

遼史卷七十五考證

王郁傳郁兄都囚父自爲留後帝遣郁討之至定州都
堅壁不出掠居民而還○

臣長發

按資治通鑑望都

之敗契丹主責王郁繫之以歸自是不聽其謀遼史
不載其事

遼史卷七十五考證

遼史卷七十六

元中書右丞相總裁脫脫等修

列傳第六

耶律解里

耶律拔里得

耶律朔古

耶律魯不古

趙延壽

高模翰

趙思溫

耶律漚里思

張礪

耶律解里字潑單突呂不部人世爲小吏解里早隸太宗麾下擢爲軍校天顯間唐攻定州旣陷解里爲唐兵

所獲晉高祖立始歸國太宗貰其罪拜御史大夫會同九年伐晉師次滹沱河奪中渡橋降其將杜重威上命解里與降將張彥澤率騎兵三千疾趨河南所至無敢當其鋒既入汴解里等遷晉王重貴于開封府彥澤恣殺掠亂宮掖解里不能禁百姓騷然莫不怨憤車駕至京數彥澤罪斬于市汴人大悅解里亦被詰責尋釋之天祿間加守太子太傅應歷初置本部令穩解里世其職卒

耶律拔里得字孩鄰太祖弟刺葛之子太宗卽位以親愛見任會同七年討石重貴拔里得進圍德州下之擒

刺史師居番等二十七人九年再舉兵次滹沱河降杜重威戰功居多太宗入汴以功授安國軍節度使總領河北道事師還州郡往往叛以應劉知遠拔里得不能守而歸世宗卽位遷中京留守卒

耶律朔古字彌骨頂橫帳孟父之後幼爲太祖所養旣冠爲右皮室詳穩從伐渤海戰有功天顯七年授三河烏古部都詳穩平易近民民安之以故久其任會同間爲惕隱時晉主石重貴渝盟帝親征晉將杜重威擁衆拒滹沱月餘帝由他渡濟朔古與趙延壽據中渡橋重威兵却遂降是歲入汴世宗卽位朔古奉太宗喪歸上

京佐皇太后出師坐是免官卒

耶律魯不古字信寧太祖從姪也初太祖制契丹國字魯不古以贊成功授林牙監修國史後率偏師爲西南邊大詳穩從伐党項有功會河東節度使石敬瑭爲其主所討遣人求援魯不古導送于朝如其請帝親率師往援魯不古從擊唐將張敬達于太原北敗之會同初從討党項俘獲最諸將師還天冊中拜于越六年爲北院大王終年五十五

趙延壽本姓劉恒山人父邨令禧梁開平初滄州節度使劉守文陷禧其裨將趙得鈞獲延壽養以爲子少美

容貌好書史唐明宗先以女妻之及卽位封其女爲興平公主拜延壽駙馬都尉樞密使明宗子從榮恃權跋扈內外莫不震懾延壽求補外避之出爲宣武軍節度使清泰初加魯國公復爲樞密使鎮許州石敬瑭發兵太原唐遣張敬達往討會敬達敗保晉安寨延壽與德鈞往救聞晉安已破走團栢峪太宗追及延壽與其父俱降明年德鈞卒以延壽爲幽州節度使封燕王及改幽州爲南京遷留守總山南事天顯未以延壽妻在晉詔取之以歸自是益自激昂圖報會同初帝幸其第加政事令冬晉人背盟帝親征延壽爲先鋒下貝州授魏

博等州節度使封魏王敗晉軍于南樂獲其將竇項羽
軍元城晉將李守貞高行周率兵來逆破之至頓丘會
大霖雨帝欲班師延壽諫曰晉軍屯河濱不敢出戰若
徑入澶州奪其橋則晉不足平上然之適晉軍先歸澶
州高行周至析城延壽將輕兵逆戰上親督騎士突其
陣敵遂潰師還留延壽徇貝冀深三州八年再伐晉晉
主遣延壽族人趙行實以書來招時晉人堅壁不出延
壽給曰我陷虜久寧忘父母之邦若以軍逆我卽歸晉
人以爲然遣杜重威率兵迎之延壽至滹沱河據中渡
橋與晉軍力戰手殺其將王靖兩軍相拒太宗潛由他

渡濟留延壽與耶律朔古據橋敵不能奪屢敗之杜重威埽厥衆降上喜賜延壽龍鳳赭袍且曰漢兵皆爾所有爾宜親往撫慰延壽至營杜重威李守貞迎謁馬首後太宗克汴延壽因李崧求爲皇太子上曰吾於魏王雖割肌肉亦不惜但皇太子須天子之子得爲魏王豈得爲也蓋上嘗許滅晉後以中原帝延壽以故摧堅破敵延壽常以身先至是以崧達意上命遷延壽秩翰林學士承旨張礪進擬中京留守大丞相錄尚書事都督中外諸軍事上塗錄尚書事都督中外諸軍事世宗卽位以翌戴功授樞密使天祿二年薨

高模翰一名松渤海人有膂力善騎射好談兵初太祖平渤海模翰避地高麗王妻以女因罪亡歸坐使酒殺人下獄太祖知其才賞之天顯十一年七月唐遣張敬達楊光遠帥師五十萬攻太原勢銳甚石敬瑭遣人求救太宗許之九月徵兵出太原模翰與敬達軍接戰敗之太原圍解敬瑭夜出謁帝約爲父子帝召模翰等賜以酒饌親饗士卒士氣益振翌日復戰又敗之敬達鼠竄晉安寨模翰獻俘于帝會敬瑭自立爲晉帝光遠斬敬達以降諸州悉下上諭模翰曰朕自起兵百餘戰卿功第一雖古名將無以加乃授上將軍會同元年冊禮

告成宴百官及諸國使于二儀殿帝指模翰曰此國之
勇將朕統一天下斯人之力也羣臣皆稱萬歲及晉叛
盟出師南伐模翰爲統軍副使與僧過前驅拔赤城破
德貝諸寨是冬兼總左右鐵鷄子軍下關南城邑數十
三月勅虎官楊覃赴乾寧軍爲滄州節度使田武名所
圍模翰與趙延壽聚議往救俄有光自模翰目中出縈
繞旗矛燄燄如流星久之模翰喜曰此天贊之祥遂進
兵殺獲甚衆以功加侍中畧地鹽山破饒安晉人震怖
不敢接戰加太傅晉以魏府節度使杜重威領兵三十
萬來拒模翰謂左右曰軍法在正不在多以多陵少不

義必敗其晉之謂乎詰且以麾下三百人逆戰殺其先鋒梁漢璋餘兵敗走手詔褒美比漢之李陵項之杜重威等復至滹沱河帝召模翰問計上善其言曰諸將莫及此乃令模翰守中渡橋及戰復敗之上曰朕憑高觀兩軍之勢顧卿英銳無敵如鷹逐雉兔當圖形麟閣爵馳後裔已而杜重威等降車駕入汴加特進檢校太師封愨郡開國公賜璽書劔器爲汴州巡檢使平汜水諸山土賊遷鎮中京天祿二年加開府儀同三司賜對衣鞍勒名馬應歷初召爲中臺省右相至東京父老歡迎曰公起戎行致身富貴爲鄉里榮相如買臣輩不足過

也九年正月遷左相卒

趙思溫字文美盧龍人少果銳膂力兼人隸燕帥劉仁恭幕李存勗問罪于燕思溫統偏師拒之流矢中目裂裳漬血戰猶不已爲存勗將周德威所擒存勗壯而釋其縛久之日見信用與梁戰於莘縣以驍勇聞授平州刺史兼平營薊三州都指揮使神冊二年太祖遣大將經畧燕地思溫來降及伐渤海以思溫爲漢軍都團練使力戰拔扶餘城身被數創太祖親爲調藥太宗卽位以功擢檢校太保保靜軍節度使天顯十一年唐兵攻太原石敬瑭遣使求救上命思溫自嵐憲間出兵援之

既罷兵改南京留守盧龍軍節度使管內觀察處置等使開府儀同三司兼侍中賜協謀靜亂翊聖功臣尋改臨海軍節度使會同初從耶律牒螭使晉行冊禮還加檢校太師二年有星隕于庭卒上遣使賻祭贈太師魏國公子延昭延靖官至使相

耶律漚里思六院夷离堇蒲古只之後負勇畧每戰被重鎧揮鐵槊所向披靡會同間伐晉上至河而獵適海東青鵠搏雉晉人隔水以鵠引去上顧左右曰誰爲我得此入漚里思請內厩馬濟河擒之并殺救者數人還上大悅優加賞賚既而晉將杜重威逆于望都據水勒

戰漚里思介馬突陣餘軍繼之被圍衆言陣薄處可出
漚里思曰恐彼有他備竟引兵衝堅而出迴視衆所指
皆大塹也其料敵多此類是年總領敵烈皮室軍坐私
免部曲奪官卒

張礪磁州人初仕唐爲掌書紀遷翰林學士會石敬瑭
起兵唐主以礪爲招討判官從趙德鈞援張敬達于河
東及敬達敗礪入契丹後太宗見礪剛直有文彩擢翰
林學士礪臨事必盡言無所避上益重之未幾謀亡歸
爲追騎所獲上責曰汝何故亡礪對曰臣不習北方土
俗飲食居處意常鬱鬱以是亡耳上顧通事高彥英曰

朕嘗戒汝善遇此人何乃使失所而亡礪去可再得耶
遂杖彥英而謝礪會同初陞翰林承旨兼吏部尚書從
太宗伐晉入汴諸將蕭翰耶律郎五麻答輩肆殺掠礪
奏曰今大遼始得中國宜以中國人治之不可專用國
人及左右近習苟政令乖失則人心不服雖得之亦將
失之上不聽改右僕射兼門下侍郎平章事頃之車駕
北還至欒城崩時礪在恒州蕭翰與麻答以兵圍其第
礪方卧病出見之翰數之曰汝何故於先帝言國人不
可爲節度使我以國舅之親有征伐功先帝留我守汴
以爲宣武軍節度使汝獨以爲不可又譖我與解里好

掠人財物子女今必殺汝趣令鎖之礪抗聲曰此國家大體安危所繫吾實言之欲殺卽殺奚以鎖爲麻答以礪大臣不可專殺乃救止之是夕礪恚憤卒

論曰初晉因遼之兵而得天下故兼臣禮而父事之割地以爲壽輸帛以爲貢未久也而會同之師次滹沱矣豈羣帥貪功贖武而致然歟抑所謂信不由衷也哉模翰以功名自終可謂良將若延壽之勲雖著至於覬覦儲位謬矣利令智昏固無足議若乃成末釁以虧儁功如解里者何譏焉

遼史卷七十六

遼史卷七十六考證

趙廷壽傳世宗卽位以翌戴功授樞密使天祿二年薨

○臣浩按延壽之圖自立世宗之執延壽通鑑紀載

甚詳遼史皆不載

趙思溫傳子延昭○臣人龍按延昭通鑑作延照爲石

晉祁州刺史

遼史卷七十六考證

遼史卷七十七

元中書右丞相總裁脫脫等修

列傳第七

耶律屋質

耶律吼

何魯不

耶律安搏

耶律注

耶律頽昱

耶律撻烈

耶律屋質字敵輦系出孟父房姿簡靜有器識重然諾遇事造次處之從容人莫能測博學知天文會同間爲惕隱太宗崩諸大臣立世宗太后聞之怒甚遣皇子李胡以兵逆擊遇安端劉哥等于泰德泉敗歸李胡盡執

世宗臣僚家屬謂守者曰我戰不克先殪此曹人皆恟恟相謂曰若果戰則是父子兄弟相夷矣軍次潢河橫渡隔岸相拒時屋質從太后世宗以屋質善籌欲行間乃設事奉書以試太后太后得書以示屋質屋質讀竟言曰太后佐太祖定天下故臣願竭死力若太后見疑臣雖欲盡忠得乎爲今之計莫若以言和解事必有成否卽宜速戰以決勝負然人心一搖國禍不淺惟太后裁察太后曰我若疑卿安肯以書示汝屋質對曰李胡永康王皆太祖子孫神器非移他族何不可之有太后宜思長策與永康王和議太后曰誰可遣者對曰太后

不疑臣臣請往萬一永康王見聽廟社之福太后乃遣屋質授書於帝帝遣宣徽使耶律海思復書辭多不遜屋質諫曰書意如此國家之憂未艾也能釋怨以安社稷則臣以爲莫若和好帝曰彼衆烏合安能敵我屋質曰卽不敵奈骨肉何況未知孰勝借曰幸勝諸臣之族執於李胡者無噍類矣以此計之惟和爲善左右聞者失色帝良久問曰若何而和屋質對曰與太后相見各紓忿恚和之不難不然決戰非晚帝然之遂遣海思詣太后約和往返數日議乃定始相見怨言交讓殊無和意太后謂屋質曰汝當爲我畫之屋質進曰太后與大

王若能釋怨臣乃敢進說太后曰汝第言之屋質借謁者籌執之謂太后曰昔人皇王在何故立嗣聖太后曰立嗣聖者太祖遺旨又曰大王何故擅立不稟尊親帝曰人皇王當立而不立所以去之屋質正色曰人皇王捨父母之國而奔唐子道當如是耶大王見太后不少遜謝惟怨是尋太后牽于偏愛託先帝遺命妄授神器如此何敢望和當速交戰擲籌而退太后泣曰向太祖遭諸弟亂天下荼毒瘡痍未復庸可再乎乃索籌一帝曰父不爲而子爲又誰咎也亦取籌而執左右感激大慟太后復謂屋質曰議既定神器竟誰歸屋質曰太后

若授永康王順天合人復何疑李胡厲聲曰我在元欲
安得立屋質曰禮有世嫡不傳諸弟昔嗣聖之立尚以
爲非況公暴戾殘忍人多怨讟萬口一辭願立永康王
不可奪也太后顧李胡曰汝亦聞此言乎汝實自爲之
乃許立永康帝謂屋質曰汝與朕屬尤近何反助太后
屋質對曰臣以社稷至重不可輕付故如是耳上喜其
忠天祿二年耶律天德蕭翰謀反下獄惕隱劉哥及其
弟盆都結天德等爲亂耶律石刺潛告屋質屋質遽引
入見白其事劉哥等不服事遂寢未幾劉哥邀駕觀樗
蒲捧觴上壽袖刃而進帝覺命執之親詰其事劉哥自

誓帝復不問屋質奏曰當使劉哥與石刺對狀不可輒
恕帝曰卿爲朕鞠之屋質率劍士往訊之天德等伏罪
誅天德杖翰遷劉哥以盆都使轄憂斯國三年表列泰
寧王察割陰謀事上不聽五年爲右皮室詳穩秋上祭
讓國皇帝于行宮與羣臣皆醉察割弑帝屋質聞有言
衣紫者不可失乃易衣而出亟遣人召諸王及喻禁衛
長皮室等同力討賊時壽安王歸帳屋質遣弟冲迎之
王室尚猶豫屋質曰大王嗣聖子賊若得之必不容羣
臣將誰事社稷將誰賴萬一落賊手悔將何及王始悟
諸將聞屋質出相繼而至遲明整兵出賊不意圍之遂

誅察割亂既平穆宗卽位謂屋質曰朕之性命實出卿手命知國事以逆黨財產盡賜之屋質固辭應歷五年爲北院大王總山西事保寧初宋圍太原以屋質率兵往援至白馬嶺遣勁卒夜出間道疾馳駐太原西鳴鼓舉火宋兵以爲大軍至懼而宵遁以功加千越四年漢劉繼元遣使來貢致幣於屋質屋質以聞帝命受之是年五月薨年五十七帝痛悼輟朝三日後道宗詔上京立祠祭享樹碑以紀其功云

耶律吼字曷魯六院部夷离堇蒲古只之後端慤好施不事生產太宗特加倚任會同六年爲南院大王蒞事

精簡人不敢以年少易之時晉主石重貴表不稱臣辭
多踞慢吼言晉罪不可不伐及帝親征以所部兵從既
入汴諸將皆取內帑珍異吼獨取馬鎧帝嘉之及帝崩
于樂城無遺詔軍中憂懼不知所爲吼詣北院大王耶
律洼議曰天位不可一日曠若請于太后則必屬李胡
李胡暴戾殘忍詎能子民必欲厭人望則當立永康王
洼然之會耶律安搏來意與吼合遂定議立永康王是
爲世宗頃之以功加採訪使賜以寶貨吼辭曰臣位已
高敢復求富臣從弟的埭諸子坐事籍沒陛下哀而出
之則臣受賜多矣上曰吼舍重賞以族人爲請其賢遠

甚許之仍賜宮戶五十時有取當世名流作七賢傳者
吼與其一天祿三年卒年三十九子何魯不

何魯不字斜寧嘗與耶律屋質平察割亂穆宗以其父
吼首議立世宗故不顯用晚年爲本族敞史及景宗卽
位以平察割功授昭德軍節度使爲北院大王時黃龍
府軍將燕頗殺守臣以叛何魯不討之破於鴨綠江坐
不親追擊以至失賊杖之乾亨間卒

耶律安搏曾祖巖木玄祖之長子祖楚不魯爲本部夷
離堇父迭里幼多疾時太祖爲撻馬狝沙里常加撫育
神冊六年爲惕隱從太祖將龍軍討阻卜党項有功天

贊三年爲南院夷离董征渤海攻忽汗城俘斬甚衆太祖崩淳欽皇后稱制欲以大元帥嗣位迭里建言帝位宜先嫡長今東丹王赴朝當立由是忤旨以黨附東丹王詔下獄詞鞫加以炮烙不伏殺之籍其家安搏自幼若成人居父喪哀毀過禮見者傷之太宗屢加慰諭嘗曰此兒必爲令器旣長寡言笑重然諾動遵繩矩事母至孝以父死非罪未葬不預宴樂世宗在藩邸尤加憐恤安搏密自結納太宗伐晉還至欒城崩諸將欲立世宗以李胡及壽安王在朝猶豫未決時安搏直宿衛世宗密召問計安搏曰大王聰安寬恕人皇王之嫡長先

帝雖有壽安天下屬意多在大王今若不斷後悔無及
會有自京師來者安搏詐以李胡死傳報軍中皆以爲
信於是安搏詣北南二大王計之北院大王洼聞而遽
起曰吾二人方議此事先帝嘗欲以永康王爲儲貳今
日之事有我輩在孰敢不從但恐不白太后而立爲國
家啓釁安搏對曰大王旣知先帝欲以永康王爲儲副
況永康王賢明人心樂附今天下甫定稍緩則大事去
矣若曰太后必立李胡且李胡殘暴行路共知果嗣位
如社稷何南院大王吼曰此言是也吾計決矣乃整軍
召諸將奉世宗卽位于太宗柩前帝立以安搏爲腹心

總知宿衛是歲約和于潢河橫渡太后問安搏曰吾與汝有何隙安搏以父死爲對太后默然及置北院樞密使上命安搏爲之賜奴婢百口寵任無比事皆取決焉然性太寬事循苟簡豪猾縱恣不能制天祿未察割兵犯御幄又不能討由是中外短之穆宗卽位以立世宗之故不復委用應歷三年或誣安搏與齊王黻撒葛謀亂繫獄死姪撒給左皮室詳穩

耶律注字敏輦隋國王釋魯孫南院夷离堇綰思子少
有器識人以公輔斯之太祖時雖未官常任以事太宗
卽位爲惕隱天顯末帝援河東注爲先鋒敗張敬達軍

於太原北會同中遷北院大王及伐晉復爲先鋒與梁漢璋戰於瀛州敗之太宗崩于樂城南方州郡多叛士馬困乏軍中不知所爲注與耶律吼定策立世宗乃令諸將曰大行上寶神器無主永康王人皇王之嫡長天人所屬當立有不從者以軍法從事諸將皆曰諾世宗卽位賜官戶五十拜于越卒年五十四

耶律頽昱字團寧孟父楚國王之後父末掇嘗爲夷離堇頽昱性端直會同中領九石烈部政濟寬猛世宗卽位爲湯隱天祿三年兼政事令封漆水郡王及穆宗立以匡贊功嘗許以本部大王後將葬世宗頽昱懇言於

通鑑卷七十七 魏書
帝曰臣蒙先帝厚恩未能報幸及大葬臣請陪位帝由
是不悅寢其議薨

耶律撻烈字涅魯袞六院部郎君襲古直之後沉厚多
智有任重才年四十未仕會同間爲邊部令穩應歷初
陞南院大王均賦役勸耕稼部人化之戶口豐殖時周
人侵漢以撻烈都統西南道軍援之周已下太原數城
漢人不敢戰及聞撻烈兵至周主遣郭從義尚鈞等率
精騎拒於忻口撻烈擊敗之獲其將史彥超周軍遁歸
復所陷城邑漢主詣撻烈謝及漢主殂宋師來伐上命
撻烈爲行軍都統發諸道兵救之旣出鴈門宋諜知而

退保寧元年加兼政事令致政乾亨初召之上見鬚髮皓然精力猶健問以政事厚禮之以疾薨年七十九撻烈凡用兵賞罰信明得士卒心河東單弱不爲周宋所併者撻烈有力焉在治所不修邊幅百姓無稱年穀屢稔時耶律屋質居北院撻烈居南院俱有政迹朝議以以爲富民大王云

贊曰立嗣以嫡禮也太宗崩非安搏吼注謀而克斷策立世宗非屋質直而能諫杜太后之私折李胡之暴以成橫渡之約則亂將誰定四臣者庶幾春秋首止之功哉

遼史卷七十七

遼史卷七十七考證

耶律吼傳吼詣北院大王耶律洼議立永康王會耶律安搏來意與吼合遂定議是爲世宗以功加採訪使賜以寶貨從弟的瑑諸子賜宮戶五十○臣長發按

推戴世宗吼及諸人之功也而本紀于世宗之立並不紀吼及諸臣一語而僅于分賜翼戴諸臣列其名再吼從弟的瑑本紀又爲的魯本紀安搏爲樞密使而安搏本傳又不之載修史之互異若此

遼史卷七十七考證

遼史卷七十八

元中書右丞相總裁脫脫等修

列傳第八

耶律夷臘葛

蕭海黎

蕭護思

蕭思溫

蕭繼先

耶律夷臘葛字蘇散本宮分人檢校太師合魯之子應
歷初以父任入侍數歲始爲殿前都點檢時上新卽位
疑諸王有異志引夷臘葛爲布衣交一切機密事必與
之謀遷寄班都知賜宮戶時上酗酒數以細故殺人有

監雉者因傷雉而亡獲之欲誅夷臘葛諫曰是罪不應死帝竟殺之以屍付夷臘葛曰收汝故人夷臘葛終不爲止復有監鹿詳穩亡一鹿下獄當死夷臘葛又諫曰人命至重豈可爲一獸殺之良久得免遼法麇岐角者惟天子得射會秋獵善爲鹿鳴者呼一麇至命夷臘葛射應弦而踏上大悅賜金銀各百兩名馬百匹及黑山東抹真之地後穆宗被弒坐守衛不嚴被誅

蕭海瓌字寅的哂其先遙輦氏時爲本部夷离堇父塔列天顯間爲本部令穩海瓌貌魁偉膂力過人天祿間娶明王安端女藹因翁主應歷初察割亂藹因連坐繼

娶嘲瑰翁主上以近戚嘉其勤篤命預北府宰相選項之總知軍國事時諸王多坐反逆海璿爲人廉謹達政體每被命案獄多得其情人無寃者繇是知名漢主劉承鈞每遣使入貢必別致幣物詔許受之年五十卒帝愍悼輟朝二日

蕭護思字延寧世爲北院吏累遷御史中丞總典羣牧部籍應歷初遷左客省使未幾拜御史大夫時諸王多坐事繫獄上以護思有才幹詔窮治稱旨改北院樞密使仍命世預宰相選護思辭曰臣子孫賢否未知得一客省使足矣從之上晚歲酗酒用刑多濫護思居要地

躡躡自保未嘗一言匡救議者以是少之年五十七卒
蕭思溫小字寅古宰相敵魯之族弟忽没里之子通書
史太宗時爲奚秃里太尉尚燕國公上爲羣牧都林牙
思溫在軍中握齮修邊幅僚佐皆言非將帥才尋爲南
京留守初周人攻揚州上遣思溫躡其後憚暑不敢進
拔緣邊數城而還後周師來侵圍馮母鎮勢甚張思溫
請益兵帝報曰敵來則與統軍司併兵拒之敵去則務
農作勿勞士馬會敵入東城我軍退渡滹沱而屯思溫
勒兵徐行周軍數日不動思溫與諸將議曰敵衆而銳
戰不利則有後患不如頓兵以老其師躡而擊之可以

必勝諸將從之遂與統軍司兵會飾他說請濟師周人引退思溫亦還已而周主復北侵與其將傅元卿李崇進等分道竝進圍瀛州陷益津瓦橋淤口三關垂迫固安思溫不知計所出但云車駕旦夕至麾下士奮躍請戰不從已而陷易瀛莫等州京齊人皆震駭往往遁入西山思溫以邊防失利恐朝廷罪已表請親征會周主榮以病歸思溫退至益津僞言不知所在遇步卒二千餘人來拒敗之是年聞周喪燕民始安乃班師時穆宗酒酒嗜殺思溫以密戚預政無所匡輔士論不與十九年春蒐上射熊而中思溫與夷離畢牙里斯等進酒上

通鑑卷一百一十八 齊紀
壽帝醉還宮是夜爲庖人斯奴古等所弑思溫與南院
樞密使高勲飛龍使女里等立景宗保寧初爲北院樞
密使兼北府宰相仍命世預其選上冊思溫女爲后加
尚書令封魏王從帝獵閭山爲賊所害

蕭繼先字楊隱小字留只哥幼穎悟叔思溫命爲子睿
智皇后尤愛之乾亨初尚齊國公主拜駙馬都尉統和
四年宋人來侵繼先率邏騎逆境上多所俘獲上嘉之
拜北府宰相自是出師繼先必將本府兵先從拔狼山
石壘從破宋軍應州上南征取通利軍戰稱捷力及親
征高麗以繼先年老留守上京卒年五十八繼先雖處

富貴尚儉素所至以善治稱故將兵攻戰未嘗失利名
重戚里

論曰嗚呼人君之過莫大於殺無辜湯之伐桀也數其
罪曰竝告無辜於上下神祇武王之伐紂也數其罪曰
無辜顓天堯之伐苗民也呂侯追數其罪曰殺戮無辜
迹是言之夷獵葛之諫廩廩庶幾古君子之風矣雖然
善諫者不諫於已然蓋必先得於心術之微而察脉者
先其病而治之則易爲功穆宗沈湎失德蓋其資富彊
之勢以自肆久矣使羣臣於造次動作之際此諫彼諍
提而警之以防其甚則亦詎至是哉予以知護思思溫

遼史卷七十八
列傳
處位優重耽祿取容真鄙夫矣若海璿之折獄繼先之
善治可謂任職臣歟

遼史卷七十八

遼史卷七十八考證

蕭思溫傳周主北侵與其將傅元卿李崇進等分道並
進圍瀛州陷益津瓦橋淤口三關○臣宗楷按宋史
紀周之取三關自南而北遼史紀遼之失三關自北
而南各就其形勢而言至通鑑並無傅元卿將兵者
乃宋太祖而李重進則遼史訛爲李崇進也

從帝獵闕山爲賊所害○臣宗楷按女里傳有司案詰

女里袖中得殺樞密使蕭思溫賊書賜死高勳傳勳
謀害尚書令蕭思溫詔獄誅之據此則殺思溫之賊
乃女里與高勳也

遼史卷七十八考證

遼史卷七十九

元中書右丞相總裁脫脫等修

列傳第九

室昉

耶律賢適

女里

郭襲

耶律阿没里

室昉字夢奇南京人幼謹厚篤學不出外戶者二十年雖里人莫識其精如此會同初登進士第爲盧龍巡捕官太宗入汴受冊禮詔昉知制誥總禮儀事天祿中爲南京留守判官應歷間累遷翰林學士出入禁闥十餘

年保寧間兼政事舍人數延問古今治亂得失奏對稱旨上多昉有理劇才改南京副留守決訟平允人皆便之遷工部尚書尋改樞密副使參知政事頃之拜樞密使兼北府宰相加同政事門下平章事乾亨初監修國史統和元年告老不許進尚書無逸篇以諫太后聞而嘉獎二年秋詔修諸嶺路昉發民夫二十萬一日畢功是時昉與韓德讓耶律斜軫相友善同心輔政整析蠹弊知無不言務在息民薄賦以故法度修明朝無異議八年復請致政詔入朝免拜賜几杖太后遣閣門使李從訓持詔勞問令常居南京封鄭國公初晉國公主建

佛寺于南京上許賜額昉奏曰詔書悉罪無名寺院今以主請賜額不惟違前詔恐此風愈熾上從之表進所撰實錄二十卷手詔褒之加政事令賜帛六百匹九年薦韓德讓自代不從上以昉年老苦寒賜貂皮衾褥許乘輦入朝病劇遣翰林學士張幹就第授中京留守加尚父卒年七十五上嗟悼輟朝二日贈尚書令遺言戒厚葬恐人譽過情自志其墓

耶律賢適字阿古真于越魯不古之子嗜學有大志滑稽玩世人莫之知惟于越屋質器之嘗謂人曰是人當國天下幸甚應歷中朝臣多以言獲譴賢適樂於靜退

游獵自娛與親朋言不及時事會討烏古還擢右皮室
詳穩景宗在藩邸常與韓匡嗣女里等游言或刺譏賢
適勸以宜早疎絕由是穆宗終不見疑賢適之力也景
宗立以功加檢校太保尋遙授寧江軍節度使賜推忠
協力功臣時帝初踐阼多疑諸王或萌非望陰以賢適
爲腹心加特進同中書門下平章事保寧二年秋拜北
院樞密使兼侍中賜保節功臣三年爲西北路兵馬都
部署賢適忠介膚敏推誠待人雖燕息不忘政務以故
百司首職罔敢媮惰累年滯獄悉決之大丞相高勲契
丹行宮都部署女里席寵放恣及帝姨母保母勢薰灼

一時納賂請謁門若賈區賢適患之言于帝不報以病解職又不允令鑄手印行事乾亨初疾篤得請明年封西平郡王薨年五十三子觀音大同軍節度使

女里字涅烈袞逸其氏族補積慶宮人應歷初爲習馬不底以母憂去一日至雅伯山見一巨人惶懼走巨人止之曰勿懼我地祇也葬爾母於斯當速詣闕必貴女里從之累遷馬羣侍中時景宗在藩邸以女里出自本宮待遇殊厚女里亦傾心結納及穆宗遇弒女里奔赴景宗是夜集禁兵五百以衛旣卽位以翼戴功加政事令契丹行宮都部署賞賚甚渥尋加守太尉北漢主劉

通鑑卷之二十一 列傳
三
繼元聞女里爲上信任遇其生日必致禮女里素貪同
列蕭阿不底亦好賄二人相善人有氈裘爲臬耳子所
著者或戲曰若遇女里阿不底必盡取之傳以爲笑其
貪猥如此保寧末坐私藏甲五百屬有司方案詰女里
袖中又得殺樞密使蕭思溫賊書賜死女里善識馬嘗
行郊野見數馬跡指其一曰此奇駿也以已馬易之果
然

郭襲不知何郡人性端介識治體久淹外調景宗卽位
召見對稱旨知可任以事拜南院樞密使尋加兼政事
令以帝數游獵襲上書諫曰昔唐高祖好獵蘇世長言

不滿十旬未足爲樂高祖卽日罷史稱其美伏念聖祖
創業艱難修德布政宵旰不懈穆宗逞無厭之欲不恤
國事天下愁怨陛下繼統海內翕然鑿中興之治十餘
年間征伐未已而寇賊未弭年穀雖登而瘡痍未復正
宜戒懼修省以懷永圖側聞恣意遊獵甚於往日萬一
有銜檠之變搏噬之虞悔將何及況南有疆敵伺隙而
動聞之得無生心乎伏望陛下節從禽酣飲之樂爲生
靈社稷計則有無疆之休上覽而稱善賜協贊功臣拜
武定軍節度使卒

耶律阿没里字蒲鄰遙輦朝古可汗之四世孫幼聰敏

保寧中爲南院宣徽使統和初皇太后稱制與耶律斜軫參預國論爲都統以征高麗功遷北院宣徽使加政事令四年春宋將曹彬米信等侵燕上親征阿没里爲都監屢破敵軍十二年行在多盜阿没里立禁捕法盜始息先是叛逆之家兄弟不知情者亦連坐阿没里諫曰夫兄弟雖曰同胞賦性各異一行逆謀雖不與知輒坐以法是刑及無罪也自今雖同居兄弟不知情者免連坐太后嘉納著爲令致仕卒阿没里性好聚斂每從征所掠人口聚而建城請爲豐州就以家奴閭貴爲刺史時議鄙之子賢哥左夷离畢

論曰景宗之世人望中興豈其勤心庶績而然蓋承穆宗醬虐之餘爲善易見亦由羣臣多賢左右弼諧之力也室昉進無逸之篇郭襲陳諫獵之疏阿没里請免同氣之坐所謂仁人之言其利博哉賢適忠介亦近世之名臣女里貪猥後人所當取鑑者也

遼史卷七十九

遼史卷七十九考證

室昉傳樞密副使參知政事拜樞密使兼北府宰相加
同政事門下平章事○臣人龍按百官志止云室昉

爲政事舍人其樞密副使參知政事樞密使北府宰
相同政事門下平章事職任甚重竟不載且北府宰
相皇族四帳世預其選室昉南京人何爲亦被簡用
而景宗本紀又不見室昉宰相之命是其中必有誤
也

遼史卷七十九考證

遼史卷八十

元中書右丞相總裁脫脫等修

列傳第十

張儉

邢抱朴

馬得臣

蕭朴

耶律八哥

張儉宛平人性端慤不事外飾統和十四年舉進士第一調雲州幕官故事車駕經行長吏當有所獻聖宗獵雲中節度使進曰臣境無他產惟幕僚張儉一代之寶願以爲獻先是上夢四人侍側賜食人二口至聞儉名

始悟召見容止朴野訪及世務占奏三十餘事由此顧
遇特異踐歷清華號稱明幹開泰中累遷同知樞密院
事太平五年出爲武定軍節度使移鎮大同六年入爲
南院樞密使帝方眷倚參知政事吳叔達與儉不相能
帝怒出叔達爲康州刺史拜儉左丞相封韓王帝不豫
受遺詔輔立太子是爲興宗賜貞亮弘靖保義守節者
德功臣拜太師中書令加尚父徙王陳重熙五年帝幸
禮部貢院及親試進士皆儉發之進見不名賜詩褒美
儉衣唯紬帛食不重味月俸有餘賜給親舊方冬奏事
便殿帝見衣袍弊惡密令近侍以火夾穿孔記之屢見

不易帝問其故儉對曰臣服此袍已三十年時尚奢靡故以此微諷喻之上憐其清貧令恣取內府物儉奉詔持布三端而出益見獎重儉弟五人上欲俱賜進士第固辭有司獲盜八人旣戮之乃獲正賊家人訴寃儉三乞申理上勃然曰卿欲朕償命耶儉曰八家老稚無告少加存恤使得收葬足慰存沒矣乃從之儉在相位二十餘年裨益爲多致政歸第會宋書辭不如禮上將親征幸儉第尚食先往具饌却之進葵羹乾飯帝食之美徐問以策儉極陳利害且曰第遣一使問之何必遠勞車駕上悅而止復卽其第賜宴器玩悉與之十二年薨

年九十一勅葬宛平縣

邢抱朴應州人刑部郎中簡之子也抱朴性穎悟好學博古保寧初爲政事舍人知制誥累遷翰林學士加禮部侍郎統和四年山西州縣被兵命抱朴鎮撫之民始安加戶部尚書遷翰林學士承旨與室昉同修實錄決南京滯獄還優詔褒美十年拜叅知政事以樞密使韓德讓薦按察諸道守令能否而黜陟之大協人望尋以母憂去官詔起視事表乞終制不從宰相密諭上意乃視事人以孝稱及耶律休哥留守南京又多滯獄復詔抱朴平決之人無冤者改南院樞密使卒贈侍中初抱

朴與弟抱質受經于母陳氏皆以儒術顯抱質亦官至侍中時人榮之

馬得臣南京人好學博古善屬文尤長於詩保寧間累遷政事舍人翰林學士常預朝議以正直稱乾亨初宋師屢犯邊命爲南京副留守復拜翰林學士承旨聖宗卽位皇太后稱制兼侍讀學士上閱唐高祖太宗玄宗三紀得臣乃錄其行事可法者進之及扈從伐宋進言降不可殺亡不可追二三其德者別議詔從之俄兼諫議大夫知宣徽院事時上擊鞠無度上書諫曰臣竊觀房立齡杜如晦隋季書生向不遇太宗安能爲一代名

相臣雖不才陛下在東宮幸列侍從今又得侍聖讀未
有裨補聖明陛下嘗問臣以貞觀開元之事臣請畧陳
之臣聞唐太宗侍太上皇宴罷則挽輦至內殿玄宗與
兄弟歡飲盡家人禮陛下嗣祖考之祚躬侍太后可謂
至孝臣更望定省之餘睦六親加愛敬則陛下親親之
道比隆二帝矣臣又聞二帝耽玩經史數引公卿講學
至于日昃故當時天下翕然嚮風以隆文治今陛下游
心典籍分解章句臣願研究經理深造而篤行之二帝
之治不難致矣臣又聞太宗射豕唐儉諫之玄宗臂鷹
韓休言之二帝莫不樂從今陛下以毬馬爲樂愚臣思

之有不宜者三故不避斧鉞言之竊以君臣同戲不免分爭君得臣愧彼負此喜一不宜躍馬揮杖縱橫馳騫不顧上下之分爭先取勝失人臣禮二不宜輕萬乘之尊圖一時之樂萬一有銜勒之失其如社稷太后何三不宜儻陛下不以臣言爲迂少賜省覽天下之福羣臣之願也書奏帝嘉歎良久未幾卒贈太子太保詔有司給葬

蕭朴字延寧國舅少父房之族父勞古以善屬文爲聖宗詩友朴幼如老成人及長博學多智開泰初補牌印郎君爲南院承旨權知轉運事尋改南面林牙帝問以

政朴具陳百姓疾苦國用豐耗帝悅曰吾得人矣擢左
夷離畢時蕭合卓爲樞密使朴知部署院事以酒廢事
出爲興國軍節度使俄召爲南面林牙太平三年守太
子太傅明年拜北府宰相遷北院樞密使時太平日久
帝留心翰墨始畫譜牒以別嫡庶由是爭訟紛起朴有
吏才能知人主意敷奏稱旨朝議多取決之封蘭陵郡
王進王恒加中書令及大延琳叛詔安撫東京以便宜
從事興宗卽位皇太后稱制國事一委弟孝先方仁德
皇后以馮家奴所誣被害朴屢言其冤不報每念至此
爲之嘔血重熙初改王韓拜東京留守及遷太后于慶

州朴徙王楚升南院樞密使四年王魏薨年五十贈齊王子鐸刺國舅詳穩

耶律八哥字烏古鄰五院部人幼聰慧書一覽輒成誦統和中以世業爲本部吏未幾陞間撒狻尋轉樞密院侍御會宋將曹彬米信侵燕八哥以扈從有功擢上京留守開泰四年召爲北院樞密副使頃之留守東京七年上命東平王蕭排押帥師伐高麗八哥爲都監至開京大掠而還濟茶陀二河高麗追兵至諸將皆欲使敵渡兩河擊之獨八哥以爲不可曰敵若渡兩河必殊死戰乃危道也不若擊於兩河之間排押從之戰敗績明

年還東京奏渤海承奉官宜有以統領之上從其言置
都知押班後以茶陀之敗削使相降西北路都監卒
論曰張儉名符帝夢遂結主知服弊袍不易志敦薄俗
功著兩朝世稱賢相非過也邢抱朴甄別守令大愜人
望兩決滯獄民無冤濫馬得臣引盛唐之治以諫其君
蕭朴痛皇后之誣至於嘔血四人者皆以明經致位忠
蓋若此宜矣聖宗得人於斯爲盛

遼史卷八十

遼史卷八十一

元中書右丞相總裁脫脫等修

列傳第十一

耶律室魯

歐里斯

王繼忠

蕭孝忠

陳昭袞

蕭合卓

耶律室魯字乙辛隱六院部人魁岸美容儀聖宗同年
生帝愛之甫冠補祇候郎君未幾爲宿直官及出師伐
宋爲隊帥從南府宰相耶律奴瓜統軍使蕭撻覽畧地
趙魏有功加檢校太師爲北院大王攻拔通利軍宋和

議成特進門下平章事賜推誠竭節保義功臣以本部俸羊多闕部人空乏請以羸老之羊及皮毛歲易南中絹彼此利之拜北院樞密使封韓王自韓德讓知北院職多廢曠室魯拜命之日朝野相慶從上獵松林至沙嶺卒年四十四贈守司徒政事令二子十神奴歐里斯十神奴南院大王

歐里思字留隱少有大志未冠補祇候郎君開泰初爲本部司徒秩滿閑居徵爲郎君班詳穩遷右皮室詳穩將本部兵從東平王蕭排押伐高麗至茶陀二河戰不利歐里斯獨全軍還帝嘉賞終西南面招討使

王繼忠不知何郡人仕宋爲鄆州刺史殿前都虞候統和二十一年宋遣繼忠屯定之望都以輕騎覘我軍遇南府宰相耶律奴瓜等獲之太后知其賢授戶部使以康默記族女女之繼忠亦自激昂事必盡力宋以繼忠先朝舊臣每遣使必有附賜聖宗許受之二十二年宋使來聘遺繼忠弧矢鞭策及求和劄子有曰自臨大位愛養黎元豈欲窮兵惟思息戰每敕邊事嚴諭守臣至于北界人民不令小有侵擾衆所具悉爾亦備知向以知雄州何承知已布此懇自後杳無所聞汝可密言如許通和卽當別使往請詔繼忠與宋使相見仍許講和

以繼忠家無奴隸賜宮戶三十加左武衛上將軍攝中京留守五年爲漢人行宮都部署封琅邪郡王六年進楚王賜國姓上嘗宴飲議以蕭合卓爲北院樞密使繼忠曰合卓雖有刀筆才暗於大體蕭敵烈才行兼備可任上不納竟用合卓及遣合卓伐高麗繼忠爲行軍副部署攻興化鎮月餘不下師還上謂明於知人拜樞密使太平三年致仕卒子懷玉仕至防禦使

蕭孝忠字撒板小字圖古斯志慷慨開泰中補祇候郎君尚越國公主拜駙馬都尉累遷殿前都點檢太平中擢北府宰相重熙七年爲東京留守時禁渤海人擊毬

孝忠言東京最爲重鎮無從禽之地若非毬馬何以習武且天子以四海爲家何分彼此宜弛其禁從之十二年入朝封楚王拜北院樞密使國制以契丹漢人分北南院樞密治之孝忠奏曰一國二樞密風俗所以不同若併爲一天下幸甚事未及行薨追封楚國王帝素服哭臨赦死囚數人爲孝忠薦福葬日親臨賜宮戶守塚子阿速終南院樞密使

陳昭袞小字王九雲州人工譯鞬勇而善射統和中補祇候郎君爲奚拽刺詳穩累遷敦睦宮太保兼掌圍場事開泰五年秋大獵帝射虎以馬馳太速矢不及發虎

怒奮勢將犯蹕左右辟易昭袞捨馬捉虎兩耳騎之虎駭且逸上命衛士追射昭袞大呼止之虎雖軼山昭袞終不墮地伺便拔佩刀殺之輦至上前慰勞良久卽日設燕悉以席上金銀器賜之特加節鉞遷圍場都太師賜國姓命張儉呂德懋賦以美之遷歸義軍節度使同知上京留守歷西南面招討都監卒

蕭合卓字合魯隱突呂不部人始爲本部吏統和初以謹恪補南院侍郎十八年北院樞密使韓德讓舉合卓爲中丞以太后遺物使宋還遷北院樞密副使開泰三年爲左夷離畢合卓久居近職明習典故善占對以是

尤被寵渥陞北院樞密使時議以爲無完行不可大用
南院樞密使王繼忠侍宴又譏其短帝頗不悅六年遣
合卓伐高麗還時求進者多附之然其服食僕馬不加
于舊帝知其廉以族屬女妻其子詔許親友饋獻豪貴
奔趨于門太平五年有疾帝欲臨視合卓辭曰臣無狀
猥蒙重仕今形容毀瘁恐陛下見而動心帝從之會北
府宰相蕭朴問疾合卓執其手曰吾死君必爲樞密使
慎勿舉勝已者朴出而鄙之是日卒子烏古終本部節
度使

論曰統和諸臣名昭王室者多矣室魯拜樞密使朝野

遼史卷八十一
列傳
四
相慶必有得民心者繼忠旣不能死國雖通南北之和
有知人之鑑奚足尚哉孝忠昭袞皆有可稱者合卓臨
終教蕭朴母舉勝已者樞密其誤國之罪大矣

遼史卷八十一考證

王繼忠傳子懷玉仕至防禦使○

臣宗萬

按宋史繼忠

子有懷節懷敏懷德懷政而此云懷玉者意宋史所載乃官其四子之名而懷玉則繼忠仕契丹所生子也

遼史卷八十一考證

遼史卷八十二

元中書右丞相總裁脫脫等修

列傳第十二

耶律隆運

德威

滄魯

制心

耶律勃古哲

蕭陽阿

武白

蕭常哥

耶律虎古

磨魯古

耶律隆運本姓韓名德讓西南面招討使匡嗣之子也
統和十九年賜名德昌二十二年賜姓耶律二十八年
復賜名隆運重厚有智略明治體喜建功立事侍景宗

以謹飭聞加東頭承奉官補樞密院通事轉上京皇城使遙授彰德軍節度使代其父匡嗣爲上京留守權知京事甚有聲尋復代父守南京時人榮之宋兵取河東侵燕五院糾詳穩奚底統軍蕭討古等敗歸宋兵圍城招脅甚急人懷二心隆運登城日夜守禦援軍至圍解及戰高梁河宋兵敗走隆運邀擊又破之以功拜遼興軍節度使徵爲南院樞密使景宗疾大漸與耶律斜軫俱受顧命立梁王爲帝皇后爲皇太后稱制隆運總宿衛事太后益寵任之統和元年加開府儀同三司兼政事令四年宋遣曹彬米信將十萬衆來侵隆運從太后

出師敗之加守司空封楚國公師還與北府宰相室昉共執國政上言西州數被兵加以歲饑宜輕稅賦以來流民從之六年太后觀擊鞠胡里室突隆運墜馬命立斬之詔率師伐宋圍沙堆敵乘夜來襲隆運嚴軍以待敗走之封楚王九年復言燕人挾姦苟免賦役貴族因爲囊橐可遣北院宣徽使趙智戒諭從之十一年丁母憂詔強起之明年室昉致政以隆運代爲北府宰相仍領樞密使監修國史賜興化功臣十二年六月奏三京諸鞠獄官吏多因請託曲加寬貸或妄行榜掠乞行禁止上可其奏又表請任賢去邪太后喜曰進賢輔政真

大臣之職優加賜賚服闋加守太保兼政事令會北院
樞密使耶律斜軫薨詔隆運兼之久之拜大丞相進王
齊總二樞府事以南京平州歲不登奏免百姓農器錢
及請平諸郡商賈價並從之二十二年從太后南征及
河許宋成而還徙王晉賜姓出宮籍隸橫帳季父房後
乃改賜今名位親王上賜田宅及陪葬地從伐高麗還
得久疾帝與后臨視醫藥薨年七十一贈尚書令謚文
忠官給葬具建廟乾陵側無子清寧三年以魏王貼不
子耶魯爲嗣天祚立以皇子敖盧斡繼之弟德威姪制
心

德威性剛介善馳射保寧初歷上京皇城使儒州防禦使改北院宣徽使乾亨初丁父喪彊起復職權西南招討使統和初党項寇邊一戰却之賜劔許便宜行事領突呂不迭刺二紮軍以討平稍古葛功真授招討使夏州李繼遷叛宋內附德威請納之旣得繼遷諸夷皆從璽書褒獎與楊隱耶律善補敗宋將楊繼業加開府儀同三司政事門下平章事未幾以山西城邑多陷奪兵柄李繼遷受賂潛懷二心奉詔率兵往諭繼遷託以西征不出德威至靈州俘掠而還年五十五卒贈兼侍中子雱金終彰國軍節度使二孫謝十滌魯謝十終楊隱

滌魯字遵寧幼養宮中授小將軍重熙初歷北院宣徽使右林牙副點檢拜惕隱改西北路招討使封漆水郡王請減軍籍三千二百八十人後以私取回鶻使者獮毛裘及私取阻卜貢物事覺決大杖削爵免官俄起爲北院宣徽使十九年改烏古敵烈部都詳穩尋爲東北路詳穩封混同郡王清寧初徙王鄧擢拜南府宰相以年老乞骸骨更王漢太康中薨年八十滌魯神情秀徹聖宗子視之興宗待以兄禮雖貴愈謙初爲都點檢扈從獵黑嶺獲熊上因樂飲謂滌魯曰汝有求乎對曰臣富貴踰分不敢他望惟臣叔先朝優遇身歿之後不肖

子坐罪籍沒四時之薦享諸孫中得赦一人以主祭臣願畢矣詔免籍復其產子燕五官至南京步軍都指揮使

制心小字可汗奴父德崇善醫視人形色輒決其病累官至武定軍節度使制心善訓鷹隼統和中爲歸化州刺史開泰中拜上京留守進漢人行宮都部署封漆水郡王以皇后外弟恩遇日隆樞密副使蕭合卓用事制心奏合卓寡識度無行檢上默然每內宴歡洽輒避之皇后不悅曰汝不樂耶制心對曰寵貴鮮能長保以是爲憂耳太平中歷中京留守惕隱南京留守徙王燕遷

南院大王或勸制心奉佛對曰吾不知佛法惟心無私則近之矣一日沐浴更衣而臥家人聞絲竹之聲怪而入視則已逝矣年五十三贈政事令追封陳王守上京時酒禁方嚴有捕獲私醞者一飲而盡笑而不詰卒之日部民若哀父母

耶律勃古哲字蒲奴隱六院夷離菴蒲古只之後勇悍善治生保寧中爲天德軍節度使歷南京侍衛馬步軍都指揮使以討平党項羌阿里撤米僕里鼈米遷南院大王聖宗卽位太后稱制會羣臣議軍國事勃古哲上疏陳便宜數事稱旨卽日兼領山西路諸州事統和四

年宋將曹彬等侵燕勃古哲擊之甚力賜輸忠保節致
主功臣總知山西五州會有告勃古哲曲法虐民者按
之有狀以大杖決之八年爲南京統軍使卒子爰里官
至詳穩

蕭陽阿字稍隱端毅簡嚴識遼漢字通天文相法父卒
自五蕃部親挽喪車至奚王嶺人稱其孝年十九爲本
班郎君歷鐵林鐵鷄大鷹三軍詳穩乾統元年由烏古
敵烈部屯田太保爲易州刺史幸臣劉彥良嘗以事至
州怙寵恣橫爲陽阿所沮彥良歸妄加毀訾尋遣人代
陽阿州民千餘詣闕請留卽日授武安州觀察使歷烏

古涅里順義彰信等軍節度使權知東北路統軍使事
聞耶律郎不鐸魯斡等叛獨引麾下三十餘人追捕之
身被二創生擒十餘人送之行在坐不獲首惡免官未
幾權南京留守卒

武白不知何郡人爲宋國子博士差知相州至通利軍
爲我軍所俘詔授上京國子博士改臨潢縣令遷廣德
軍節度副使先是有訟宰相劉愼行與子婦姚氏私者
有司出其罪聖宗詔白鞫之白正其事使新羅還權中
京留守時愼行諸子皆處權要以白斷百姓分籍事不
直坐左遷未幾遷尚書左丞知樞密事拜遼興軍節度

使致仕卒

蕭常哥字胡獨堇國舅之族祖約直同政事門下平章事父實老累官節度使常哥魁偉寡言年三十餘始爲祇候郎君歷本族將軍松山州刺史壽隆二年以女爲燕王妃拜永興宮使及妃生子爲南院宣徽使尋改漢人行宮都部署統和初加太子太師爲國舅詳穩二年改遼興軍節度使召爲北府宰相以柴冊禮加兼侍中天慶元年致仕卒諡曰欽肅

耶律虎古字海鄰六院夷离堇覲烈之孫少穎悟重然諾保寧初補御琰郎君十年使宋還以宋取河東之意

通史卷八十二 列傳
六

聞于上燕王韓匡嗣曰何以知之虎古曰諸僭號之國
宋皆併收惟河東未下今宋講武習戰意必在漢匡嗣
力沮乃止明年宋果伐漢帝以虎古能料事器之乃曰
吾與匡嗣慮不及此授涿州刺史統和初皇太后稱制
召赴京師與韓德讓以事相忤德讓怒取護衛所執戎
仗擊其腦卒子磨魯古

磨魯古字遙隱有智識善射統和初拜南面林牙四年
宋侵燕太后親征磨魯古爲前鋒手中流矢拔而復進
太后旣至磨魯古以創不能戰與北府宰相蕭繼先巡
邏境上累遷北院大王七年伐宋爲先鋒與耶律奴瓜

破其將李忠吉于定州以疾卒于軍

論曰德讓在統和間位兼將相其克敵制勝進賢輔國
功業茂矣至賜姓名王齊晉抑有寵於太后而致然歟
宗族如德威平党項滌魯完宗祀制心不苟合家聲益
振豈無所自哉若勃古之忠陽阿之孝武白之直亦彬
彬乎一代之良臣矣

遼史卷八十二

遼史卷八十三

元中書右丞相總裁脫脫等修

列傳第十三

耶律休哥

馬哥

耶律斜軫

耶律奚低

耶律學古

烏不呂

耶律休哥字遜寧祖釋魯隋國王父綰思南院夷離堇
休哥少有公輔器初烏古室韋二部叛休哥從北府宰
相蕭幹討之應歷末爲惕隱乾亨元年宋侵燕北院大
王奚底統軍使蕭討古等敗績南京被圍帝命休哥代
奚底將五院軍往救遇大敵于高梁河與耶律斜軫分

通鑑卷八十二 宋紀

左右翼擊敗之追殺三十餘里斬首萬餘級休哥被三
創明旦宋主遁去休哥以創不能騎輕車追至涿州不
及而還是年冬上命韓匡嗣耶律沙伐宋以報圍城之
役休哥率本部兵從匡嗣等戰于滿城翌日將復戰宋
人請降匡嗣信之休哥曰彼衆整而銳必不肯屈乃誘
我耳宜嚴兵以待匡嗣不聽休哥引兵憑高而視須臾
南兵大至鼓譟疾馳匡嗣倉卒不知所爲士卒棄旗鼓
而走遂敗績休哥整兵進擊敵乃却詔總南面戍兵爲
北院大王車駕親征圍瓦橋關宋兵來救守將張師突
圍出帝親督戰休哥斬師餘衆退走入城宋陣于水南

將戰帝以休哥馬介獨黃慮爲敵所識乃賜玄甲白馬
易之休哥率精騎渡水擊敗之追至莫州橫屍滿道韞
矢俱罄生獲數將以獻帝悅賜御馬金盃勞之曰爾勇
過于名若人人如卿何憂不克師還拜于越聖宗卽位
太后稱制令休哥總南面軍務以便宜從事休哥均戍
兵立更休法勸農桑修武備邊境大治統和四年宋復
來侵其將范密楊繼業出雲州曹彬米信出雄易取岐
溝涿州陷固安置屯時北南院奚部兵未至休哥力寡
不敢出戰夜以輕騎出兩軍間殺其單弱以脅餘衆晝
則以精銳張其勢使彼勞於防禦以疲其力又設伏林

莽絕其糧道曹彬等以糧運不繼退保白溝月餘復至休哥以輕兵薄之伺彼募食擊其離伍單出者且戰且却由是南軍自救不暇結方陣塹地兩邊而行軍渴乏井漉淖而飲凡四日始達于涿聞太后軍至彬等冒雨而遁太后益以銳卒追及之彼力窮環糧車自衛休哥圍之至夜彬信以數騎亡去餘衆悉潰追至易州東聞宋師尚有數萬瀕沙河而饜促兵往擊之宋師望塵奔竄墮岸相蹂死者過半沙河爲之不流太后旋旆休哥收宋屍爲京觀封宋國王又上言可乘宋弱略地至河爲界書奏不納及太后南征休哥爲先鋒敗宋兵於望

都時宋將劉廷讓以數萬騎並海而出約與李敬源合
兵聲言取燕休哥聞之先以兵扼其要地會太后軍至
接戰殺敬源廷讓走瀛州七年宋遣劉廷讓等乘暑潦
來攻易州諸將憚之獨休哥率銳卒逆擊于沙河之北
殺傷數萬獲輜重不可計獻于朝太后嘉其功詔免拜
不名自是宋不敢北向時宋人欲止兒啼乃曰于越至
矣休哥以燕民疲弊省賦役恤孤寡戒戍兵無犯宋境
雖馬牛逸于北者悉還之遠近向化邊鄙以安十六年
薨是夕雨木冰聖宗詔立祠南京休哥智略宏遠料敵
如神每戰勝讓功諸將故士卒樂爲之用身更百戰未

通鑑卷八十三 死傳
嘗殺一無辜二子高八官至節度使高十終于越孫馬哥

馬哥字訛特懶興宗時以散職入見上問卿奉佛乎對曰臣每旦誦太祖太宗及先臣遺訓未暇奉佛帝悅清寧中遷唐古部節度使咸雍中累遷匡義軍節度使太康初致仕卒

耶律斜軫字韓隱于越曷魯之孫性明敏不事生產保寧元年樞密使蕭思溫薦斜軫有經國才上曰朕知之第佚蕩豈可羈屈對曰外雖佚蕩中未可量乃召問以時政占對剴切帝器重之妻以皇后之姪命節制西南

面諸軍仍援河東改南院大王乾亨初宋再攻河東從
耶律沙至白馬嶺遇敵沙等戰不利斜軫赴之令麾下
萬矢齊發敵氣褫而退是年秋宋下河東乘勝襲燕北
院大王耶律奚底與蕭討古逆戰敗績退屯清河北斜
軫取奚底等青幟軍于得勝口以誘敵敵果爭赴斜軫
出其後奮擊敗之及高梁之戰與耶律休哥分左右翼
夾擊大敗宋軍統和初皇太后稱制益見委任爲北院
樞密使會宋將曹彬米信出雄易楊繼業出代州太后
親帥師救燕以斜軫爲山西路兵馬都統繼業陷山西
諸郡各以兵守自屯代州斜軫至定安遇賀令圖軍擊

破之追至五臺斬首數萬級明日至蔚州敵不敢出斜軫書帛射城上諭以招慰意陰聞宋軍來救令都監耶律題子夜伏兵險阨俟敵至而發城守者見救至突出斜軫擊其背二軍俱潰追至飛狐斬首一萬餘級遂取蔚州賀令圖潘美復以兵來斜軫逆于飛狐擊敗之宋軍在渾源應州者皆棄城走斜軫聞繼業出兵令蕭撻凜伏兵于路明日繼業兵至斜軫擁衆爲戰勢繼業麾幟而前斜軫佯退伏兵發斜軫進攻繼業敗走至狼牙村衆軍皆潰繼業爲流矢所中被擒斜軫責曰汝與我國角勝三十餘年今日何面目相見繼業但稱死罪而

已初繼業在宋以驍勇聞人號楊無敵首建梗邊之策至狼牙村心惡之欲避不可得旣擒三日死斜軫歸闕以功加守太保從太后南伐卒于軍太后親爲哀臨仍給葬具庶子狗兒官至小將軍

耶律奚低孟父楚國王之後便弓馬勇於攻戰景宗時多任以軍事統和四年爲右皮室詳穩時宋將楊繼業陷山西郡縣奚低從樞密使斜軫討之凡戰必以身先矢無虛發繼業敗于朔州之南匿深林中奚低望袍影而射繼業墮馬先是軍令須生擒繼業奚低以故不能爲功後太后南伐屢有戰績以病卒

耶律學古字乙辛隱于越洼之庶孫穎悟好學工譯觀
及詩保寧中補御蓋郎君乾亨元年宋旣下河東乘勝
侵燕學古受詔往援始至京宋敗耶律奚底蕭討古等
勢益張圍城三周穴地而進城中民懷二心學古以計
安反側隨宜備禦晝夜不少懈適有敵三百餘人夜登
城學古戰却之會援軍至圍遂解學古開門列陣四面
鳴鼓居民大呼聲震天地旋有高梁之捷以功遙授保
靜軍節度使爲南京馬步軍都指揮使二年伐宋乞將
漢軍從之改彰國軍節度使時南境未靜民思休息學
古禁寇掠以安之會宋將潘美率兵分道來侵學古以

軍少虛張旗幟雜丁黃爲疑兵是夜適獨虎峪舉烽火遣人偵視見敵俘掠村野擊之悉獲所掠物擒其將領自是學古與潘美各守邊約無相侵軼民獲安業以功爲惕隱卒弟烏不呂

烏不呂字留隱嚴重有膂力善屬文統和中伐宋屢任以軍事嘗與交直不相能因曰爾奴才何所知交直訟于北院樞密使韓德讓德讓怒問曰爾安得此奴耶烏不呂對曰三父異籍時亦易得德讓笑而釋之後從蕭恒德伐蒲盧毛朶部以功爲東路統軍都監及德讓爲大丞相薦其材可任統軍使太后曰烏不呂嘗不遜於

卿何善而薦德讓奏曰臣忝相位於臣猶不屈況於其餘以此知可用若任使之必能鎮撫諸蕃太后從之加金紫崇祿大夫檢校太尉而弟國留以罪亡烏不呂及其母俱下吏恐禍及母陰使人召國留給曰太后知事之誣汝第來勿畏國留至送有司坐誅其後退歸田里以疾卒

論曰宋乘下太原之銳以師圍燕繼遣曹彬楊繼業等分道來伐是兩役也遼亦岌岌乎殆哉休哥奮擊于高粱敵兵奔潰斜軫擒繼業于朔州旋復故地宋自是不復深入社稷固而邊境寧雖配古名將無愧矣然非學

古之在南京安其反側則二將之功蓋亦難致故曰國
以人重信哉

遼史卷八十三

遼史卷八十三考證

耶律休哥傳七年宋遣劉廷讓等乘暑潦來攻易州休哥率銳卒逆擊于沙河之北殺傷數萬獲輜重不可計○臣浩按廷讓沙河之敗宋史不載

耶律斜軫傳繼業爲流矢所中被擒斜軫責曰汝與我國角勝三十餘年今日何面目相見繼業但稱死罪而已○臣浩按楊業秉性忠義被擒三日不食死安得有稱死罪之語至業之稱繼業以業在北漢時原賜姓劉名繼業也

遼史卷八十三考證

遼史卷八十四

元中書右丞相總裁脫脫等修

列傳第十四

耶律沙

耶律抹只

蕭幹

詩古

耶律善補

耶律海里

耶律沙字安隱其先嘗相遙輦氏應歷間累官南府宰相景宗卽位總領南面邊事保寧間宋攻河東沙將兵救之有功加守太保乾亨初宋復北侵沙將兵由間道至白馬嶺阻大澗遇敵沙與諸將欲待後軍至而戰冀

通鑑卷之九十四 宋紀
王敵烈監軍耶律抹只等以爲急擊之便沙不能奪敵
烈等以先鋒渡澗未半爲宋人所擊兵潰敵烈及其子
蛙哥沙之子德里令穩都敏詳穩唐筈等五將俱沒會
北院大王耶律斜軫兵至萬矢俱發敵軍始退沙將趨
太原會漢駙馬都尉盧俊來奔言太原已陷遂勒兵還
宋乘銳侵燕沙與戰于高粱河稍却遇耶律休哥及斜
軫等邀擊敗宋軍宋主宵遁至涿州微服乘驢車間道
而走上以功釋前過是年復從韓匡嗣伐宋敗績帝欲
誅之以皇后營救得免睿智皇后稱制召賜几杖以優
其老復從伐宋敗劉廷讓李敬源之軍賜賚優渥統和

六年卒

耶律抹只字留隱仲父隋國王之後初以皇族入侍景宗卽位爲林牙以幹給稱保寧間遷樞密副使宋攻河東南府宰相耶律沙爲都統將兵往援抹只監其軍及白馬嶺之敗僅以身免宋乘銳攻燕將奚兵翌休哥擊敗之上以功釋前過十一年從都統韓匡嗣伐宋戰于滿城爲宋將所給諸軍奔潰獨抹只部伍不亂徐整旗鼓而歸璽書褒諭改南海軍節度使乾亨二年拜樞密副使統和初爲東京留守宋將曹彬米信等侵邊抹只引兵至南京先繕守禦備及車駕臨幸抹只與耶律休

哥逆戰于涿之東克之遷開遠軍節度使故事州民歲輸稅斗粟折錢五抹只表請折錢六部民便之統和末卒

蕭幹小字項烈字婆典北府宰相敵魯之子性質直初察割之亂其黨胡古只與幹善使人召之幹曰吾豈能從逆臣縛其人送壽安王賊平上嘉其忠拜羣牧都林牙復以伐烏古功遷北府宰相改突呂不部節度使乾亨初宋伐河東乘勝侵燕詔幹拒之戰于高梁河耶律沙退走幹與耶律休哥等併力戰敗之上手勅慰勞自是每征伐必參決軍事加政事令二年宋兵圍瓦橋夜

襲我營幹及耶律勻骨戰却之時皇后以父呼幹及后爲皇太后稱制幹數條奏便宜多見聽用統和四年卒姪討古

討古字括寧性忠簡應歷初始入侍會冀王敵烈宣徽使海思謀反討古與耶律阿烈密告於上上嘉其忠詔尚朴謹公主保寧未爲南京統軍使乾亨初宋侵燕討古與北院大王奚底拒之不克軍潰討古等不敢復戰退屯清河帝聞其敗遣使責之曰卿等不嚴偵候用兵無法遇敵卽敗奚以將爲討古懼頃之援兵至討古奮力以敗宋軍上釋其罪降爲南京侍衛親軍都指揮使

四年卒

耶律善補字瑤昇孟父楚國王之後純謹有才智景宗卽位授千牛衛大將軍遷大同軍節度使及伐宋韓匡嗣與耶律沙將兵由東路進善補以南京統軍使由西路進善補聞匡嗣失利斂兵還乾亨末與宋軍戰于滿城爲伏兵所圍斜軫救之獲免以失備大杖決之統和初爲惕隱會宋來侵善補爲都元帥逆之不敢戰故嶺西州郡多陷罷惕隱以其叔安端有匡輔世宗功上愍之徵善補爲南府宰相遷南院大王會再舉伐宋欲攻魏府召衆集議將士以魏城無備皆言可攻善補曰攻

固易然城大叵量若克其城士卒貪俘掠勢必不可遏
且傍多巨鎮各出援兵內有重敵何以當之上乃止善
補性懦守靜凡征討憚攻戰急還以故戰多不利年七
十四卒

耶律海里字留隱令穩授里得之長子察割之亂其母
的魯與焉遣人召海里海里拒之亂平的魯以子故獲
免海里儉素不喜聲利以射獵自娛雖居閑人敬之若
貴官然保寧初拜彰國軍節度使遷惕隱秩滿稱疾不
仕久之復爲南院大王及曹彬米信等來侵海里有却
敵功賜資忠保義匡國功臣帝屢親征海里在南院十

遼史卷八十四
餘年鎮以寬靜戶口增給時議重之封漆水郡王遷上
京留守薨詔以家貧給葬具

論曰當高梁朔州之捷偏裨之將如沙與抹只旣因休
哥斜軫類見其功所謂失之東隅收之桑榆若蕭幹海
里拒察割之招討古告海思之變則不止有戰功而已
其視善補畏懦豈不優哉

遼史卷八十四

遼史卷八十五

元中書右丞相總裁脫脫等修

列傳第十五

蕭撻凜

蕭觀音奴

耶律題子

耶律諧理

耶律奴瓜

蕭柳

高勲

奚和朔奴

蕭塔烈葛

耶律撒合

蕭撻凜字馳寧思溫之再從姪父朮魯列善相馬應歷
間爲馬群侍中撻凜幼敦厚有才略通天文保寧初爲

宿直官累任薨劇統和四年宋楊繼業率兵由代州來
侵攻陷城邑撻凜以諸軍副部署從樞密使耶律斜軫
敗之擒繼業于朔州六年秋改南院都監從駕南征攻
沙堆力戰被創太后嘗親臨視明年加右監門衛上將
軍檢校太師遙授彰德軍節度使十一年與東京留守
蕭恒德伐高麗破之高麗稱臣奉貢十二年夏人梗邊
皇太妃受命總烏古及永興宮分軍討之撻凜爲阻卜
都詳穩凡軍中號令太妃並委撻凜師還以功加兼侍
中封蘭陵郡王十五年敵烈部人殺詳穩而叛遁于西
北荒撻凜將輕騎逐之因討阻卜之未服者諸蕃歲貢

方物充于國自後往來若一家焉上賜詩嘉獎仍命林牙耶律昭作賦以述其功撻凜以諸部叛服不常上表乞建三城以絕邊患從之俄召爲南京統軍使二十年復伐宋擒其將王先知破其軍于遂城下祁州上手詔獎諭進至澶淵宋主軍於城隍間未接戰撻凜按視地形取宋之羊觀鹽堆鳧鷹中伏弩卒明日轉車至太后哭之慟輟朝五日子慥古南京統軍使

蕭觀音奴字耶寧奚王搭紇之孫統和十二年爲右祇候郎君班詳穩遷奚六部大王先是俸秩外給獐鹿百數皆取於民觀音奴奏罷之及伐宋與蕭撻凜爲先鋒

降祁州下德清軍上加優賞同知南院事卒

耶律題子字勝隱北府宰相兀里之孫善射工畫保寧間爲御盞郎君九年奉使于漢具言兩國通好長久之計其主繼元深加禮重統和二年將兵與西邊詳穩耶律速撒討陀羅斤大破之四年宋將楊繼業陷山西城邑題子從北院樞密使耶律斜軫擊之敗賀令圖於定安授西南面招討都監宋兵守蔚州急召外援題子聞之夜伏兵道傍黎明宋兵果來過未半而擊之城巾軍出斜軫復邀之兩軍俱潰奔飛狐地隘不得進殺傷甚衆賀令圖復集敗卒來襲蔚州題子逆戰破之應州守

將自遁進圍寰州冒矢石登城宋軍大潰當斜軫擒繼業于朔州題子功居多是年冬復與蕭撻凜由東路擊宋俘獲甚衆後聞宋兵屯易州率兵逆之至易境而卒初題子破令圖宋將有因傷而仆題子繪其狀以示宋人咸嗟神妙

耶律諧理字烏古鄰突舉部人統和五年宋將楊繼業來攻山西諧理從耶律斜軫擊之常居先鋒偵候有功是歲伐宋宋人拒於滹沱河諧理率精騎便道先濟獲其將康保威以功詔世預節度使選太平元年稍遷本部節度使六年從蕭惠攻甘州不克會阻卜攻圍三尅

軍諧理與都監耶律涅魯古往救至可敦城西南遇敵不能陣中流矢卒

耶律奴瓜字延寧太祖異母弟南府宰相蘇之孫有膂力善調鷹隼統和四年宋楊繼業來侵奴瓜爲黃皮室亂都監擊敗之盡復所陷城邑軍還加諸衛小將軍及伐宋有功遷黃皮室詳穩六年再舉將先鋒軍敗宋游兵于定州爲東京統軍使加金紫崇祿大夫從奚王和朔奴伐兀惹以戰失利削金紫崇祿階十九年拜南府宰相二十一年復伐宋擒其將王繼忠于望都俘殺甚衆以功加同政事門下平章事二十六年爲遼興軍節

度使尋復爲南府宰相開泰初加尚父卒

蕭柳字徒門淳欽皇后弟阿古只五世孫幼養于伯父排押之家多知能文膂力絕人統和中叔父恒德臨終薦其才詔入侍衛十七年南伐宋將范庭召列方陣而待時皇弟隆慶爲先鋒問諸將佐誰敢當者柳曰若得駿馬則願爲之先隆慶授以甲騎柳攬轡謂諸將曰陣若動諸君急攻遂馳而前敵少却隆慶席勢攻之南軍遂亂中流矢暴創而戰衆皆披靡時排押留守東京奏柳爲四軍兵馬都指揮使明年爲北女直詳穩政濟寬猛部民畏愛遷東路統軍使秩滿百姓願留復任許之

從伐高麗遇大蛇當路前驅者請避柳曰壯士安懼此
拔劍斷蛇師還致仕柳好滑稽雖君臣燕飲詼諧無所
忌時人比之俳優臨終謂人曰吾少有致君志不能直
遂故以諧進冀萬有一補俳優名何避頃之被寢衣而
坐呼曰吾去矣言訖而逝耶律觀音奴集柳所著詩千
篇目曰歲寒集

高勲字鼎臣晉北平王信輜之子性通敏仕晉爲閣門
使會同九年與杜重威來降太宗入汴授四方館使好
結權貴能服勦大臣多推譽之天祿間爲樞密使總漢
軍事五年劉崇遣使來求封冊詔勲冊崇爲大漢神武

皇帝應歷初封趙王出爲上京留守尋移南京會宋欲城益津勲上書請假巡徼以擾之帝然其奏宋遂不果城十七年宋略地益津關勲擊敗之知南院樞密事景宗卽位以定策功進王秦保寧中以南京郊內多隙地請疏畦種稻帝欲從之林牙耶律昆宣言於朝曰高勲此奏必有異志果令種稻以水爲畦設以京叛官軍何自而入帝疑之不納尋遷南院樞密使以毒藥餽駙馬都尉蕭啜里事覺流銅州尋又謀害尚書令蕭思溫詔獄誅之没其產皆賜思溫家

奚和朔奴字籌寧奚可汗之裔保寧中爲奚六部長統

和初皇太后稱制以耶律休哥領南邊事和朔奴爲南面行軍副部署四年宋曹彬米信等來侵和朔奴與休哥破宋兵于燕南手詔褒美軍還怙權搥無罪人李浩至死上以其功釋之冬南征將本部軍由別道進擊敵軍於狼山俘獲甚衆八年上表曰臣竊見太宗之時奚六部二宰相二常袞誥命大常袞班在會長左右副常袞總知會長五房族屬二宰相匡輔會長建明善事今宰相職如故二常袞別無所掌乞依舊制從之十三年秋遷都部署伐兀惹駐于鐵驪林馬數月進至兀惹城利其俘掠請降不許令急攻之城中大恐皆殊死戰和

朔奴知不能克從副部署蕭恒德讓掠地東南循高麗北界而還以地遠糧絕士馬死傷詔降封爵卒子烏也郎君班詳穩

蕭塔列葛字雄隱五院部人八世祖只魯遙輦氏時嘗爲虞人唐安祿山來攻只魯戰于黑山之陽敗之以功爲北府宰相世預其選塔列葛仕開泰間累遷西南面招討使重熙十一年使西夏諭伐宋事約元昊出別道以會十二年改右夷離畢同知南京留守轉左夷離畢俄授東京留守以世選爲北府宰相卒

耶律撒合字率懶乙室部人南府宰相歐禮斯子天祿

間始仕應歷中拜乙室大王兼知兵馬事乾亨初宋來
侵詔以本部兵守南京與北院大王奚底統軍蕭討古
等逆戰奚底等敗走獨撒合全軍還上諭之曰拒敵當
如此卿勉之無憂不富貴加守太保統和間卒

論曰遼在統和間數舉兵伐宋諸將如耶律諧理奴瓜
蕭柳等俱有降城擒將之功最後以蕭撻凜爲統軍直
抵澶淵將與宋戰撻凜中弩我兵失倚和議始定或者
天厭其亂使南北之民休息者耶

遼史卷八十五

遼史卷八十六

元中書右丞相總裁脫脫等修

列傳第十六

耶律合住

劉景

劉六符

耶律裹履

牛溫舒

杜防

蕭和尚

特末

耶律合理只

耶律頗的

耶律合住字粘衮太祖弟迭刺之孫幼不好弄臨事明敏善談論初以近族入侍每從征伐有功保寧初加右

龍虎衛上將軍以宋師屢梗南邊拜涿州刺史西南兵馬都監招安巡檢等使賜推忠奉國功臣合住久任邊防雖有克獲功然務鎮靜不妄生事以邀近功鄰壤敬畏屬部又安宋數遣人結歡冀達和意合住表聞其事帝許議和安邊懷敵多有力焉拜左金吾衛上將軍秩滿遙攝鎮國軍節度使卒合住智而有文曉暢戎政鎮范陽時嘗領數騎徑詣雄州北門與郡將立馬陳兩國利害及周師侵邊本末辭氣慷慨左右壯之自是邊境數年無事識者以謂合住一言賢於數十萬兵

劉景字可大河間人四世祖忭卽木滔之甥唐右僕射

盧龍軍節度使父守敬南京副留守景資端厚好學能文燕王趙延壽辟爲幽都府文學應歷祔遷右拾遺知制誥爲翰林學士九年周人侵燕留守蕭思溫上急變帝欲俟秋出師景諫曰河北三關已陷于敵今復侵燕安可坐視上不聽會父憂去未幾起復舊職一日召草赦旣成留數月不出景奏曰唐制赦書日行五百里今稽期弗發非也上亦不報景宗卽位以景忠實擢禮部侍郎遷尚書宣政殿學士上方欲倚用乃書其笏曰劉景可爲宰相頃之爲南京副留守時留守韓匡嗣因扈從北上景與其子德讓共理京事俄召爲戶部使歷武

定開遠二軍節度使統和六年致仕加兼侍中卒年六十七贈太子太師子慎行孫一德二玄三嘏四端五常六符皆具六符傳

劉六符父慎行由膳部員外郎累遷至北府宰相監修國史時上多卽宴飲行誅賞慎行諫曰以喜怒加威福恐未當帝悟諭政府自今宴飲有刑賞事翌日稟行爲都統伐高麗以失軍期下吏議貴乃免出爲彰武軍節度使賜保節功臣子六人一德二玄三嘏四端五常六符德早世玄終上京留守常歷三司使武定軍節度使嘏端符皆第進士嘏端俱尚主爲駙馬都尉三嘏獻聖

宗一矢斃雙鹿賦上嘉其贍麗與公主不諧奔宋歸殺之四端以衛尉少卿使宋賀生辰方宴大張女樂竟席不顧人憚其嚴還拜樞密直學士六符有志操能文重熙初遷政事舍人擢翰林學士十一年與宣徽使蕭特末使宋索十縣地還爲漢人行宮副部署會宋遣使增歲幣以易十縣復與耶律仁先使宋定進貢名宋難之六符曰本朝兵疆將勇海內共知人人願從事于宋若恣其俘獲以飽所欲與進貢字孰多况大兵駐燕萬一南進何以禦之顧小節忘大患悔將何及宋乃從之歲幣稱貢六符還加同中書門下平章事及宋幣至命六

符爲三司使以受之六符與參知政事杜防有隙防以六符嘗受宋賂白其事出爲長寧軍節度使俄召爲三司使道宗卽位將行大冊禮北院樞密使蕭革曰行大禮備儀物必擇廣地莫若黃川六符曰不然禮儀國之大體帝王之樂不奏于野今中京四方之極朝覲各得其所宜中京行之上從其議尋以疾卒

耶律裊履字海隣六院夷离堇蒲古只之後風神爽秀工于畫重熙間累遷同知點檢司事駙馬都尉蕭胡覩爲夏人所執奉詔索之三返以歸轉永興宮使右祇候郎君班詳穩裊履將娶秦晉長公主孫其母與公主婢

有隙謂褻履曰能去婢乃許爾婚褻履以計殺之婚成
事覺有司以大辟論褻履善畫寫聖宗真以獻得減坐
長流邊戍復以寫真召拜同知南院宣徽事使宋賀正
寫宋主容以歸清寧間復使宋宋主賜宴瓶花隔面未
得其真陛辭僅一視及境以像示餞者駭其神妙聞重
元亂不卽勤王賊平入賀帝責讓之宴酣顧褻履曰重
元事成卿必得爲上客褻履大慙咸雍中加太子太師
卒

牛溫舒范陽人剛正尚節義有遠器咸雍中擢進士第
滯小官大安初累遷戶部使轉給事中知三司使事國

民兼足上以爲能加戶部侍郎改三司使壽隆中拜參知政事兼同知樞密院事攝中京留守部民詣闕請真拜從之召爲三司使乾統初復參知政事知南院樞密使事五年夏爲宋所攻來請和解溫舒與蕭得里底使宋方大燕優人爲道士裝索土泥藥爐優曰土少不能和溫舒遽起以手籍土懷之宋主問其故溫舒對曰臣奉天子威命來和若不從則當卷土收去宋人大驚遂許夏和還加中書令卒

杜防涿州歸義縣人開泰五年擢進士甲科累遷起居郎知制誥人以爲有宰相器太平中遷政事舍人拜樞

密副使重熙九年夏人侵宋宋遣郭禎來告請與夏和
上命防使夏解之如約罷兵各歸侵地拜參知政事韓
紹芳劉六符忌之防待以誠十二年紹芳等罷愈見信
任十二年拜南府宰相防生子帝幸其第賜名王門奴
以進奏有誤出爲武定軍節度使十四年復召爲南府
宰相二十一年秋祭仁德皇后詔儒臣賦詩防爲冠賜
金帶道宗諒陰爲大行皇帝山陵使清寧二年上諭防
曰朕以卿年老嗜酒不欲煩以劇務朝廷之事總綱而
已頃之拜右丞相加尚父卒上歎悼不已賜贈加等官
給葬具贈中書令諡曰元蕭子公謂終南府宰相

蕭和尚字洪寧國舅大父房之後忠直多志畧開泰初補玉盞郎君尋爲內史太醫等局都林牙使宋賀正將宴典儀者告班節度使下和尚曰班次如此是不以大國之使相禮且以錦服爲貺如待蕃部若果如是吾不預宴宋臣不能對易以紫服位視執政使禮始定八年秋爲唐古部節度使卒弟特末

特末字何寧爲人機辨任氣太平中累遷安東軍節度使有能稱十一年召爲左祇候郎君班詳穩未幾遷左夷離畢重熙十年累遷北院宣徽使劉六符使宋索十縣故地宋請增銀絹十萬兩正以易之歸稱旨加同政

事門下平章事詔城西南渾底甸還復爲北院宣徽使
卒

耶律合里只字特滿六院夷离堇蒲古只之後重熙中
累遷西南面招討都監充宋國生辰使館于白溝驛宋
宴勞優者嘲蕭惠河西之敗合里只曰勝負兵家常事
我嗣聖皇帝俘石重貴至今典中有石家寨惠之一敗
何足較哉宋人慚服帝聞之曰優伶失辭何可傷兩國
交好鞭二百免官清寧初起爲懷化軍節度使七年入
爲北院大王封幽國公歷遼興軍節度使東北路詳穩
加兼侍中致仕卒合里只明達勤恪懷柔有道置諸賓

館及西邊營田皆自合里只發之

耶律頗的字撒版季父房奴瓜之孫孤介寡合重熙初補牌印郎君清寧初稍遷知易州去官部民請留許之咸雍八年改彰國軍節度使上獵大牢古山頗的謁于行宮帝問邊事對曰自應州南境至天池皆我耕牧之地清寧間邊將不謹爲宋所侵烽埃內移似非所宜遣宗然之拜北面林牙後遣人使宋得其侵地命頗的往定疆界還拜南院宣徽使太康四年遷忠順軍節度使尋爲南院大王改同知南京留守事召拜南府宰相賜貞良功臣封吳國公爲北院樞密使廉謹奉公知無不

爲大安中致仕卒子霞抹北院樞密副使

論曰耶律合住安邊講好養兵息民其慮深遠矣六符啓爨邀功豈國家之利哉牛杜頗的合里只輩銜命出使幸不辱命裒履殺人婢以求婚身負罪爨畫其主容以冀免死亦可醜也

遼史卷八十六

遼史卷八十七

元中書右丞相總裁脫脫等修

列傳第十七

蕭孝穆

撒八
孝友

孝先

蕭蒲奴

耶律蒲古

夏行美

蕭孝穆小字胡獨堇淳欽皇后弟阿古只五世孫父陶
瑰爲國舅詳穩孝穆廉謹有禮法統和二十八年累遷
西北路招討都監開泰元年遙授建雄軍節度使加檢
校太保是年木烈等變孝穆擊走之冬進軍可敦城阻
卜結五羣牧長查刺阿覲等謀中外相應孝穆悉誅之

迺嚴備禦以待餘黨遂潰以功遷九水諸部安撫使尋
拜北府宰相賜忠穆熙霸功臣檢校太師同政事門下
平章事八年還京師太平二年知樞密院事充漢人行
宮都部署三年封燕王南京留守兵馬都總管九年大
延琳以東京叛孝穆爲都統討之戰于蒲水中軍稍却
副部署蕭匹敵都監蕭蒲奴以兩翼夾擊賊潰追敗之
于手山北延琳走入城深溝自衛孝穆圍之築重城起
樓櫓使內外不通城中撤屋以嬰其將楊詳世等擒
延琳以降遼東悉平改東京留守賜佐國功臣爲政務
寬簡撫納流徙其民安之興宗卽位徙王秦尋復爲南

京留守重熙六年進封吳國王拜北院樞密使八年表
請籍天下戶口以均徭役又陳諸部及舍利軍利害從
之由是政賦稍平衆悅九年徙王楚時天下無事戶口
蕃息上富于春秋每言及周取十縣慨然有南伐之志
群臣多順旨孝穆諫曰昔太祖南伐終以無功嗣聖皇
帝仆唐立晉後以重貴叛長驅入汴鑿馭始旋反來侵
軼自後連兵二十餘年僅得和好蒸民樂業南北相通
今國家比之曩日雖曰富彊然勲臣宿將往往物故且
宋人無罪陛下不宜棄先帝盟約時上意已決書奏不
報以年老乞骸骨不許十一年復爲北院樞密使更王

齊薨追贈大丞相晉國王諡曰貞孝穆雖椒房親位高益畏太后有賜輒辭不受妻子無驕色與人交始終如一所薦拔皆忠直士嘗語人曰樞密選賢而用何事不濟若自親煩碎則大事凝滯矣自蕭合卓以吏才進其後轉効不知大體歎曰不能移風易俗偷安爵位臣子之道若是乎時稱爲國寶臣目所著文曰寶老集二子阿刺撒八弟孝先孝忠孝友各有傳

撒八字周隱七歲以戚屬加左右千牛衛大將軍重熙初補祇候郎君性廉介風姿爽朗善毬馬馳射帝每燕飲喜諧謔撒八雖承寵顧常以禮自持時人稱之以柴

冊禮恩加檢校大傅永興宮使總領左右護衛同知點
檢司事尚魏國公主拜駙馬都尉爲北院宣徽使仍總
知朝廷禮儀重熙末出爲西北路招討使武寧郡王居
官以治稱清寧初薨年三十九追封齊王

孝先字延寧小字海里統和十八年補祗候郎君尚南
陽公主拜駙馬都尉開泰五年爲國舅詳穩將兵城東
鄙還爲南京統軍使太平三年爲漢人行宮都部署尋
加太子太傅五年遷上京留守以母老求侍復爲國舅
詳穩改東京留守會大延琳反被圍數月穴地而出延
琳平留守上京十一年帝不豫欽哀召孝先總禁衛事

興宗諒陰欽哀弒仁德皇后孝先與蕭泥卜蕭匹敵等謀居多及欽哀攝政造授天平軍節度使加守司徒兼政事令重熙初封楚王爲北院樞密使孝先以椒房親爲太后所重在樞府好惡自恣權傾人主朝多側目二年太后與孝先謀廢立事帝知之勒衛兵出宮召孝先至諭以廢太后意孝先震懾不能對遷太后于慶州孝先恒鬱鬱不樂四年徙王晉後爲南京留守卒諡忠肅孝友字撻不衍小字陳留開泰初以戚屬爲小將軍太平元年以大冊加左武衛大將軍檢校太保賜名孝友重熙元年累遷西北路招討使封蘭陵郡王八年進王

陳先是蕭惠爲招討使專以威制西羌諸夷多叛孝友下車厚加綏撫每入貢輒增其賜物羌人以安久之寢成姑息諸夷桀驁之風遂熾議者譏其過中十年加政事令賜劾節宣庸定遠功臣更王吳後以葬兄孝穆孝忠還京師拜南院樞密使加賜翊聖協穆保義功臣進王趙拜中書令丁母憂起復北府宰相出知東京留守會伐夏孝友與樞密使蕭惠失利河南帝欲誅之太后救免復爲東京留守徙王燕改上京留守更王秦清寧初加尚父頃之復留守東京明年復爲北府宰相帝親製誥詞以褒寵之以柴冊恩遙授洛京留守益賜純德

功臣致仕進封豐國王坐子胡覩首與重元亂伏誅年七十三胡覩在逆臣傳

蕭蒲奴字留隱奚王楚不寧之後幼孤貧傭于醫家牧牛傷人稼數遭笞辱醫者嘗見蒲奴熟寐有蛇遶身異之教以讀書聰敏嗜學不數年涉獵經史習騎射旣冠意氣豪邁開泰間選充護衛稍進用俄坐罪黥流烏古部久之召還累任劇遷奚六部大王治有聲太平九年大延琳據東京叛蒲奴爲都監將右翼軍遇賊戰蒲水中軍少却蒲奴與左翼軍夾攻之先據高麗女直要衝使不得求援又敗賊于手山延琳走入城蒲奴不介馬

而馳追殺餘賊已而大軍圍東京蒲奴討諸叛邑平吼
山賊延琳堅守不敢出旣被擒蒲奴以功加兼侍中重
熙六年改北阻卜副部署再授奚六部大王十五年爲
西南面招討使西征夏國蒲奴以兵二千據河橋聚巨
艦數十艘仍作大鉤人葺測戰之日布舟于河綿亘三
十餘里遣人伺上流有浮物輒取之大軍旣失利蒲奴
未知適有大水順流而下勢將壞浮梁斷歸路操舟者
爭鉤致之橋得不壞明年復西征懸兵深入大掠而還
復爲奚六部大王致仕卒

耶律蒲古字提隱太祖弟蘇之四世孫以武勇稱統和

初爲涿州刺史從伐高麗有功開泰末爲上京內客省副使太平二年城鴨綠江蒲古守之在鎮有治績五年改廣德軍節度使尋遷東京統軍使莅政嚴肅諸部懾服九年大延琳叛以書結保州夏行美執其人送蒲古蒲古人據保州延琳氣沮以功拜惕隱十一年爲子鐵驪所弒

夏行美渤海人太平九年大延琳叛時行美總渤海軍于保州延琳使人說欲與俱叛行美執送統軍耶律蒲古又誘賊黨百人殺之延琳謀沮迺嬰城自守數月而破以功加同政事門下平章事錫賚甚厚明年擢忠順

軍節度使重熙十七年遷副部署從點檢耶律義先討蒲奴里獲其酋陶得里以歸致仕卒上思其功遣使祭于家

論曰不有君子其能國乎方其擒延琳定遼東一時諸將之功偉矣宜其撫劍抵掌賈餘勇以威天下也蕭孝穆之諫南侵其意防何其弘遠歟是豈臆句語難者所能知哉至論移風俗爲治之本親煩碎爲失大臣體又何其深切著明也爲國寶臣宜矣孝先預弑仁德之謀猶依城社以逃熏灌爲國巨蠹雖功何議焉

遼史卷八十七

遼史卷八十八

元中書右丞相總裁脫脫等修

列傳第十八

蕭敵烈

拔刺

耶律盆奴

蕭排押

恒德

匹敵

耶律資忠

耶律瑤質

耶律弘古

高正

耶律的瑒

大康父

蕭敵烈字涅魯袞宰相撻烈四世孫識度弘遠爲鄉里推重始爲牛羣敵史帝聞其賢召入侍遷國舅詳穩統

和二十八年帝謂羣臣曰高麗康肇弑其君誦立誦族
兄詢而相之大逆也宜發兵問其罪羣臣皆曰可敵烈
諫曰國家連年征討士卒抗敵况陛下在諒陰年穀不
登創痍未復島夷小國城壘完固勝不爲武萬一失利
恐貽後悔不如遣一介之使往問其故彼若伏罪則已
不然俟服除歲豐舉兵未晚時令已下言雖不行識者
諱之明年同知左夷离畢事改右夷离畢開泰初率兵
巡西邊時夷离堇部下闡撒狝撲里失室勃葛率部民
遁敵烈追擒之令復業遷國舅詳穩從樞密使耶律世
良伐高麗還加同政事門下平章事拜上京留守敵烈

爲人寬厚達政體廷臣皆謂有王佐才漢人行宮都部
署王繼忠薦其材可爲樞密使帝疑其黨而止爲中京
留守卒族子忽古有傳弟拔刺

拔刺字別勒隱多智善騎射開泰間以兄爲右夷離畢
始補郎君累遷奚六部禿里太尉太平末大延琳叛拔
刺將北南院兵往討遇于蒲水南院兵少却至手山復
與賊遇拔刺乃易兩院旗幟鼓勇力戰破之上聞以手
詔褒獎賜內廐馬重熙中遷四捷軍詳穩謝事歸鄉里
數歲起爲昭德軍節度使尋改國舅詳穩卒

耶律盆奴字胡獨董惕隱涅魯古之孫景宗時爲烏古

部詳穩政尚嚴急民苦之有司以聞詔曰盆奴任方面寄以細故究問恐損威望尋遷馬羣太保統和十六年隱實燕軍之不任事者汰之二十八年駕征高麗盆奴爲先鋒至銅州高麗將康肇分兵爲三以抗我軍一營于州西據三水之會肇居其中一營近州之山一附城而營盆奴率耶律弘古擊破三水營擒肇李玄蘊等軍望風潰會大軍至斬三萬餘級追至開京破敵於西嶺高麗王詢聞邊城不守遁去盆奴入開京焚其王宮迺撫慰其民人上嘉其功遷北院大王薨

蕭排押字韓隱國舅少父房之後多智略能騎射統和

初爲左皮室詳穩討阻卜有功四年破宋將曹彬米信
兵于望都凡軍事有疑每預參決尋總永興宮分糶及
舍利拽刺二皮室等軍與樞密使耶律斜軫收復山西
所陷城邑是冬攻宋隸先鋒圍蒲城率所部先登拔之
改南京統軍使尚衛國公主拜駙馬都尉加同政事門
下平章事十三年歷北南院宣徽使條上時政得失及
賦役法上嘉納焉十五年加政事令遷東京留守二十
二年復攻宋將渤海軍下德清軍後蕭撻凜卒專任南
面事宋和議成爲北府宰相聖宗征高麗將兵由北道
進至開京西嶺破敵軍斬數千級高麗王詢懼奔平州

排押入開京大掠而還帝嘉之封蘭陵郡王開泰二年以宰相知西南面招討使五年進王東平排押爲政寬裕而善斷諸部長愛民以殷富時議多之七年再伐高麗至開京敵奔潰縱兵俘掠而還渡茶陀二河敵夾射排押委甲仗走坐是免官太平三年復王幽薨弟恒德恒德字遜寧有膽略而善謀統和元年尚越國公主拜駙馬都尉遷南面林牙從宣徽使耶律阿没里征高麗還改北面林牙會宋將曹彬米信侵燕耶律休哥與恒德議軍事多見信用爲東京留守六年上攻宋圍沙堆恒德獨當一面城上矢石如雨恒德意氣自若督將士

奪其裨城陷中流矢太后親臨視賜藥攻長城口復先登太后益多其功時高麗未附恒德受詔率兵拔其邊城王始懼上表請降十二年八月賜啓聖竭力功臣從都部署和朔奴討兀惹未戰兀惹請降恒德利其俘獲不許兀惹死戰城不能援和朔奴議欲引退恒德曰以彼倔疆吾奉詔來討無功而還諸部謂我何若深入多獲猶勝徒返和朔奴不得已進擊東南諸部至高麗北鄙比還道遠糧絕士馬死傷甚衆坐是削功臣號十四年爲行軍都部署伐蒲盧毛朶部還公主疾太后遣宮人賢釋侍之恒德私焉公主恚而薨太后怒賜死後追

封蘭陵郡王子匹敵

匹敵字蘇隱一名昌裔生未月父母俱死育于禁掖旣長尚秦晉王公主拜駙馬都尉爲殿前副點檢統和八年改北面林牙太平四年遷殿前都點檢出爲國舅詳穩九年渤海大延琳叛劫掠隣部與南京留守蕭孝穆往討孝穆欲全城降乃築重城圍之數月城中人陰來納款遂擒延琳東京平以功封蘭陵郡王十一年聖宗不豫先是欽哀與仁德皇后有隙以匹敵嘗爲后所愛忌之時護衛馮家奴上變誣弟泥卜與匹敵謀逆以皇后攝政徐議當立者公主竊聞其謀謂匹敵曰爾將無

罪被戮與其死何若奔女直國以全其生匹敵曰朝廷
詎肯以飛語害忠良寧死弗適他國及欽哀攝政殺之
耶律資忠字沃衍小字札刺系出仲父房兄國留善屬
文聖宗重之時妻弟之妻阿古與奴通將奔女直國國
留追及奴殺之阿古自經阿古母有寵于太后事聞大
后怒將殺之帝度不能救遣人訣別問以後事國留謝
曰陛下憫臣無辜恩漏九泉死且不朽旣死人多寃之
在獄著兔賦寤寐歌爲世所稱資忠博學工辭章年四
十未仕聖宗知其賢召補宿衛數問以古今治亂資忠
對無隱開泰中授中丞眷遇日隆初高麗內屬取女直

六部地以賜至是貢獻不時至詔資忠往問故高麗無歸地意由是權貴數短於上出爲上京副留守四年再使高麗留弗遣資忠每懷君親輒有著述號西亭集帝與羣臣宴時一記憶曰資忠亦有此樂乎九年高麗上表謝罪始送資忠還帝郊迎同載以歸命大臣宴勞留禁中數日謂曰朕將屈卿爲樞密何如資忠對曰臣不才不敢奉詔乃以爲林牙知惕隱事初資忠在高麗也弟昭爲著帳郎君坐罪沒家產至是乃復橫帳且還舊產詔以外戚女妻之是時樞密使蕭合卓少師蕭把哥有寵資忠不肯俛附詆之帝怒奪官數歲出知來遠城

事歷保定昭德二軍節度使聖宗崩表請會葬既至伏梓宮大慟曰臣幸遇聖明橫被構譖不獲盡犬馬報氣絕而蘇興宗命醫治疾久之言國舅侍中無憂國心陛下不當復用唐景福舊號於是用事者惡之遣歸鎮卒弟昭有傳

耶律瑤質字拔里堇積慶宮人父候古室韋部節度使瑤質篤學廉介有經世志統和十年累遷至積慶宮使聖宗嘗諭瑤質曰聞卿正直是以進用國有利害爾言宜無所隱由是所陳多見嘉納上征高麗破康肇軍于銅州瑤質之力爲多王詢乞降羣臣議皆謂宜納瑤質

曰王詢始一戰而敗遽求納欵此詐耳納之恐墮其姦計待其勢窮力屈納之未晚已而詢果遁清野無所獲其衆阻險而壘攻之不下瑤質以計降之擢拜四蕃部詳穩時招討使耶律頗的爲總管瑤質耻居其下上表曰臣先朝舊臣今旣垂老乞還新命覬得常侍左右帝曰朕不使汝久處是任且命無隸招討得專奏事到部戢暴懷善政績顯著卒于官

耶律弘古字盆納隱遙輦鮮質可汗之後統和初嘗以軍事任爲拽刺詳穩尋徙南京統軍使十三年徇地南鄙克敵於四岳橋斬首百餘級攻宋以戰功遷東京留

守封楚國公後伐高麗副先鋒耶律盆奴擒康肇于銅州三十年西北部叛從南府宰相耶律奴瓜討之及典禁軍號令整肅諸部多降尋遷侍中卒

高正不知何郡人統和初舉進士第累遷樞密直學士上將伐高麗遣正先往諭意及還遷右僕射時高麗王詢表請入覲上許之遣正率騎兵千人送之館于路爲高麗將卓思正所圍正以勢不可敵與麾下壯士突圍出士卒死傷者衆上悔輕發釋其罪明年遷工部侍郎爲北院樞密副使開泰五年卒

耶律的琿字耶寧仲父房之後習兵事爲左皮室詳穩

統和二十八年伐高麗的瑑率本部軍與益奴等擒康肇李玄蘊于銅州帝壯之曰以卿英才爲國戮力真吾家千里駒也乃賜御馬及細鎧明年爲北院大王出爲烏古敵烈部都詳穩年七十二卒

大康又渤海人開泰間累官南府宰相出知黃龍府善綏撫東部懷服榆里底乃部長伯陰與榆烈比來附送于朝且言蒲盧毛朶界多渤海人乞取之詔從其請康又領兵至大石河馳準城掠數百戶以歸未幾卒

論曰高句驪弑其君誦而立詢遼興問罪之師宜其簞食壺漿以迎除舍以待而迺乘險旅拒俾智者竭其謀

勇者窮其力雖得其要領而顛顛獨居一海之中自若也豈服人者以德而不以力歟况乎殘毀其宮室係累其民人所謂以燕伐燕也歟嗚呼朱崖之棄捐之之力也敵烈之諫有焉

遼史卷八十八

遼史卷八十八考證

耶律資忠傳高麗內屬取女直六部地詔資忠往問故
四年再使高麗留弗遣九年高麗上表謝罪始送資
忠還○臣長發按聖宗本紀資忠使高麗者再一是
開泰二年六月還于八月一是開泰三年二月還于
九年五月本傳訛三年爲四年

遼史卷八十八考證

遼史卷八十九

元中書右丞相總裁脫脫等修

列傳第十九

耶律庶成

庶箴

蒲魯

楊哲

耶律韓留

楊佶

耶律和尚

耶律庶成字喜隱小字陳六季父房之後父吳九檢校
太師庶成幼好學書過目不忘善遼漢文字於詩尤工
重熙初補牌印郎君累遷樞密直學士與蕭韓家奴各
進四時逸樂賦帝嗟賞初契丹醫人鮮知切脉審藥上

命庶成譯方脉書行之自是人皆通習雖諸部族亦知
醫事時入禁中叅決疑議偕林牙蕭韓家奴等撰實錄
及禮書與樞密副使耶律德脩定法令上詔庶成曰方
今法令輕重不倫法令者爲政所先人命所繫不可不
慎卿其審度輕重從宜修定庶成參酌古今刊正訛謬
成書以進帝覽而善之庶成方進用爲妻胡篤所誣以
罪奪官紉爲庶耶律使吐蕃凡十二年清寧間始歸帝
知其誣詔復本族仍遷所奪官卒庶成嘗謂林牙夢善
卜者胡呂古卜曰官止林牙因妻得罪及置於理法當
離婚胡篤適有娠至期不產而死剖視之其子以手抱

心識者謂誣夫之報有詩文行于世弟庶箴

庶箴字陳甫善屬文重熙中爲本族將軍咸雍元年同知東京留守事俄徙烏衍突厥部節度使九年知薊州事明年遷都林牙上表乞廣本國姓氏曰我朝創業以來法制修明惟姓氏止分爲二耶律與蕭而已始太祖制契丹大字取諸部鄉里之名續作一篇著于卷末臣請推廣之使諸部各立姓氏庶男女婚媾有合典禮帝以舊制不可遽釐不聽太康二年出耶律乙辛爲中京留守庶箴與耶律孟簡表賀頌之乙辛復爲樞密使專權恣虐庶箴私見乙辛泣曰前抗表非庶箴之願也乙

辛信其言乃得自安聞者鄙之八年致仕卒子蒲魯

蒲魯字乃展幼聰悟好學甫七歲能誦契丹大字習漢文未十年博通經籍重熙中舉進士第主文以國制無契丹試進士之條聞于上以庶箴擅令子就科目鞭之二百尋命蒲魯爲牌印郎君應詔賦詩立成以進帝嘉賞顧左右曰文才如此必不能武事蒲魯奏曰臣自蒙義方兼習騎射在流輩中亦可周旋帝未之信會從獵三矢中三兔帝奇之轉通進是時父庶箴嘗寄戒諭詩蒲魯荅以賦衆稱其典雅寵遇漸隆清寧初卒

楊皙字昌時安次人幼通五經大義聖宗聞其穎悟詔

試詩授秘書省校書郎太平十一年擢進士乙科爲著作佐郎重熙十二年累遷樞密都承旨權度支使登對稱旨進樞密副使歷長寧軍節度使山西路轉運使知典中府清寧初入知南院樞密使與姚景行同總朝政請行柴冊禮封趙國公以足疾復知典中府咸雍初徙封齊召賜同德功臣尚書左僕射兼中書令拜樞密使改封晉給宰相樞密使兩廳廉從封趙王屢請歸政益賜保節功臣致仕太康五年例改遼西郡王薨

耶律韓留字速寧仲父隋國王之後有明識篤行義舉止嚴重工爲詩統和間召攝御院通進開泰三年稍遷

烏古敵烈部都監俄知詳穩事敵烈部叛將宮分軍從
樞密使耶律世良討平之加千牛衛大將軍重熙元年
累遷至同知上京留守改奚六部禿里太尉性不苟合
爲樞密使蕭解里所忌上欲召用韓留解里言目病不
能視議遂寢四年召爲北面林牙帝曰朕早欲用卿聞
有疾故待之至今韓留對曰臣昔有目疾才數月耳然
亦不至于昏第臣駑拙不能事權貴是以不獲早覩天
顏非陛下聖察則愚臣豈有今日耶詔進述懷詩上嘉
歎方將大用卒

楊佖字正叔南京人幼穎悟異常讀書自能成句識者

奇之弱冠聲名籍甚統和二十四年舉進士第一歷校書郎大理正開泰六年轉儀曹郎典掌書命加諫議大夫出知易州治尚清簡徵發期會必信入爲大理少卿累遷翰林學士文章號得體八年燕地饑疫民多流殍以佶同知南京留守事發倉廩振乏絕貧民鬻子者計傭而出之宋遣梅詢賀千齡節詔佶迎送多唱酬詢每見稱賞復爲翰林學士重熙元年陞翰林學士承旨丁母憂起復工部尚書歷中順軍節度使朔武等州觀察處置使天德軍節度使加特進檢校太師同中書門下平章事復拜參知政事兼知南院樞密使十五年出爲

武定軍節度使境內亢旱苗稼將槁視事之夕雨澤霑足百姓歌曰何以蘇我上天降雨誰其撫我楊公爲主灤陽水失故道歲爲民害乃以已俸創長橋人不病涉及被召郡民攀轅泣送上御清涼殿宴勞之卽日除吏部尚書兼門下侍郎同中書門下平章事上曰卿今日何減呂望之遇文王佶對曰呂望比臣遭際有十年之晚上悅其居相位以進賢爲已任事總大綱責成百司人人樂爲之用三請致政許之月給錢粟僚隸四時遣使存問卒有登瀛集行于世

耶律和尚字特抹系出季父房善滑稽重熙初補祗候

郎君時帝篤于親親凡三父之後皆序父兄行第於和
尚尤狎愛然每侍宴飲雖詼諧未嘗有一言之過由是
上益重之歷積慶永興宮使累遷至同知南院宣徽使
事南面林牙十六年出爲懷化軍節度使俄召爲御史
大夫二十三年因大冊加天平軍節度使檢校太師徙
中京路案問使卒和尚雅有美行數以財恤親友人皆
愛重然嗜酒不事事以故不獲柄用或以爲言答曰吾
非不知顧人生如風燈石火不飲將何爲晚年沈湎尤
甚人稱爲酒仙云

論曰庶成定法令治民者不容高下其手庶箴雖嘗表

請廣姓氏以秩典禮其隨勢俯仰則有愧於其子蒲魯矣楊皙爲上寵遇迭封王爵而功業不少槩見然得愛民治國之要其楊佶哉

遼史卷八十九

遼史卷九十

元中書右丞相總裁脫脫等修

列傳第二十

蕭阿剌

耶律義先

信先

蕭陶隗

蕭塔剌葛

耶律敵祿

蕭阿剌字阿里懶北院樞密使孝穆之子也幼養宮中
興宗尤愛之重熙六年爲弘義宮使累遷同知北院樞
密使加同中書門下平章事出爲東宮留守二十一年
拜西北路招討使封西北郡王尋尚秦晉國王公主拜

駙馬都尉清寧元年遺詔拜北府宰相兼南院樞密使
進王韓明年改北院樞密使徙王陳與蕭革同掌國政
革諂不法阿剌爭之不得告歸上由此惡之除東京
留守會行瑟瑟禮入朝陳時政得失革以事中傷帝怒
縊殺之皇太后營救不及大慟曰阿剌何罪而遽見殺
帝乃優加賻贈葬乾陵之赤山阿剌性忠果曉世務有
經濟才議者以謂阿剌若在無重元乙辛之亂

耶律義先于越仁先之弟也美風姿舉止嚴重重熙初
補祇候郎君班詳穩十三年車駕西征爲十二行紮都
監戰功最改南院宣徽使時蕭革同知樞密院事席寵

擅權義先疾之因侍讌言于帝曰革狡佞喜亂一朝大用必誤國家言甚激切不納它日侍宴上命羣臣博負者罰一巨觥義先當與革對慙然曰臣縱不能進賢退不肖安能與國賊博哉帝止之曰卿醉矣義先厲聲詬不已上大怒賴皇后救得解翌日上謂革曰義先無禮當黜之革對曰義先天性忠直今以酒失而出誰敢言人之過上謂革忠直益加信任義先鬱鬱不自得然議事未嘗少沮又於上前博義先祝曰向言人過昌犯天威今日一擲可表愚款俄得堂印上愕然十六年爲殿前都點檢討蒲奴里多所招降獲其酋長陶得里以歸

手詔褒獎以功改南京統軍使封武昌郡王奏請統軍
司錢營息以贍貧民未募軍器完整民得休息二十一
年拜惕隱進王富春薨年四十二義先常戒其族人曰
國中三父房皆帝之昆弟不孝不義尤不可爲其接下
無貴賤賢否皆與均禮其妻晉國長公主之女每遇中
表親非禮服不見故內外多化之清寧間追贈許王弟
信先

信先與宗以其父瑰引爲刺血友幼養于宮善騎射重
熙十四年爲左護衛太保同知殿前點檢司事十八年
兼右祇候郎君班詳穩上問所欲信先曰先臣瑰引與

陛下分如同氣然不及王封儻使蒙恩地下臣願畢矣
上曰此朕遺忘之過追封燕王是年從蕭惠伐夏敗於
河南例被責清寧初爲南面林牙卒

蕭陶隗字烏古鄰宰相轄特六世孫剛直有威重咸雍
初任馬羣太保素知羣牧名存實亡悉閱舊籍除其羸
病錄其實數牧人畏服陶隗上書曰羣牧以少爲多以
無爲有上下相蒙積弊成風不若括見真數著爲定籍
公私兩濟從之畜產歲以蕃息太康中累遷契丹行宮
都部署上嘗謂羣臣曰北樞密院軍國重任久闕其人
耶律阿思蕭幹特刺二人孰愈羣臣各譽所長陶隗獨

默然上問卿何不言陶隗曰訛特刺懦而敗事阿思有才而貪將爲禍基不得已而用敗事猶勝基禍上曰陶隗雖魏徵不能過但恨吾不及太宗爾然竟以阿思爲樞密使由是阿思銜之九年西園不寧阿思奏曰邊隅事大可擇重臣鎮撫上曰陶隗何如阿思曰誠如聖旨遂拜西南面招討使阿思陰與蕭阿忽帶誣奏賊掠漠南牧馬及居民畜產陶隗不急追捕罪當死詔免官久之起爲塌母城節度使未行疽發背卒陶隗負氣怒則須髯輒張每有大議必毅然決之雖上有難色未嘗遽已見權貴無少屈竟爲阿思所陷時人惜之二子曰圖

木轄式阿思死始獲進用

蕭塔刺葛字陶晒六院部人素剛直太祖時坐叔祖臺晒謀殺于越釋魯沒入弘義宮世宗卽位以舅氏故出其藉補國舅別部敝史或言泰寧王察割有無君心塔刺葛曰彼縱忍行不義人孰肯從他日侍宴酒酣塔刺葛捉察割耳強飲之曰上固知汝傲狠然以國屬曲加矜憫使汝在左右且度汝才何能爲若長惡不悛徒自取赤族之禍察割不能答強笑曰何戲之虐也天祿未塔刺葛爲北府宰相及察割作亂塔刺葛醉詈曰吾悔不殺此逆賊尋爲察割所害

耶律敵祿字陽隱孟父楚國王之後性質直多膂力察
割作亂敵祿聞之入見壽安王慷慨言曰願得精兵數
百破賊黨王嘉其忠穆宗卽位爲北院宣徽使上以飛
狐道狹詔敵祿廣之明年將兵援河東至太原與漢王
會于高平擊周軍敗之仍降其衆忻代二州叛將兵討
之會耶律撻烈至敗周師於忻口師還卒

論曰忠臣惟知有國而不知有身故惡惡不避其患阿
刺以諂諛不法折蕭革陶隗以用必基禍言阿思塔刺
葛以忍行不義徒自取赤族之罪責察割其心可謂忠
矣言一出而禍輒隨之吁邪正旣不辨國焉得無亂哉

乾隆四年校刊

卷之九十一

五

遼史卷九十

遼史卷九十一

元中書右丞相總裁脫脫等修

列傳第二十一

耶律韓八

耶律唐古

蕭朮哲

藥師奴

耶律玦

耶律僕里篤

耶律韓八字嘲隱侷儻有大志北院詳穩古之五世孫
太平中游京師寓行宮側惟囊衣匹馬而已帝微服出
獵見而問之曰汝爲何人韓八初不識漫應曰我北院
部人韓八來覓官耳帝與語知有長才陰識之會北院
奏南京疑獄久不決帝召韓八馳驛審錄舉朝皆驚韓

八量情處理人無冤者上嘉之籍羣牧馬闕其二同事者考尋不已韓八略不加詰卽先馳奏帝益信任景福元年爲左夷離畢徙北面林牙眷遇優異重熙六年改北院大王政務寬仁復爲左夷離畢十二年再爲北院大王入朝帝從容謂曰卿守邊任重當實府庫振貧乏以報朕旣受詔愈竭忠謹知無不言便益爲多卒年五十五上聞悼惜死之日篋無舊蓄斂無新衣遣使弔祭給葬具韓八平居不屑細務喜愠不形嘗失所乘馬家僮以同色者代之數月不覺

耶律唐古字敵隱于越屋質之庶子廉謹善屬文統和

二十四年述屋質安民治盜之法以進補小將軍遷西南面巡檢歷豪州刺史唐古部詳穩嚴立科條禁姦民鬻馬於宋夏界因陳弭私販安邊境之要太后嘉之詔邊境遵行著爲令朝議欲廣西南封域黑山之西綿亘數千里唐古言戍壘太遠卒有警急赴援不及非良策也從之西蕃來侵詔議守禦計命唐古勸督耕稼以給西軍田于臚胸河側是歲大熟明年移屯鎮州凡十四稔積粟數十萬斛斗米數錢重熙間改隗衍党項部節度使先是築可敦城以鎮西域諸部縱民畜牧反招寇掠重熙四年上疏曰自建可敦城已來西蕃數爲邊患

每煩遠戍歲月既久國力耗竭不若復守故疆省罷戍
役不報是年致仕乞勒其父屋質功于石帝命耶律庶
成製文勒石上京崇孝寺卒年七十八

蕭朮哲字石魯隱孝穆弟高九之子以戚屬加監門衛
上將軍重熙十三年將衛兵討李元昊有功遷興聖宮
使蒲奴里部長陶得里朮哲爲統軍都監從都統耶
律義先擊之擒陶得里朮哲與義先不協誣義先罪免
官稍遷西南面招討都監坐事下獄以太后言杖而釋
之清寧初爲國舅詳穩西北路招討使私取官粟三百
斛及代留畜產令主者鬻之以償後族弟胡覲到部發

其事帝怒決以大杖免官尋起爲昭德軍節度使徵爲北院宣徽使九年上以朮哲先爲招討威行諸部復爲西北路招討使訓士卒增器械省追呼嚴號令人不敢犯邊境晏然十年入朝封柳城郡王咸雍二年拜北府宰相爲北院樞密使耶律乙辛所忌誣朮哲與護衛蕭忽古等謀害乙辛詔獄無狀罷相出鎮順義軍卒追王晉宋梁三國姪藥師奴

藥師奴幼穎悟謹禮法補祇候郎君太康中爲興聖宮使累遷同知殿前點檢司事上嘉其宿衛嚴肅遷右夷離畢夏王李乾順爲宋所攻求解帝命藥師奴持節使

宋請罷兵通好宋從之拜南面林牙改漢人行宮副部
署乾統初出爲安宋軍節度使卒

耶律玦字吾展遙輦鮮質可汗之後重熙初召脩國史
補符寶郎累遷知北院副部署事入見太后后顧左右
曰先皇謂玦必爲偉人果然除樞密副使出爲西南面
招討都監歷同簽南京留守事南面林牙皇弟秦國王
爲遼興軍節度使以玦同知使事多所匡正十年復爲
樞密副使咸雍初兼北院副部署及秦國王爲西京留
守請玦爲佐從之歲中獄空者三召爲孟父房徹穩玦
不喜貨殖帝知其貧賜宮戶十嘗謂宰相曰契丹忠正

無如玦者漢人則劉伸而已然熟察之玦優於伸先是西北諸部久不能平上遣玦問狀執弛慢者痛繩之以酒疾卒

耶律僕里篤字燕隱六院林牙突呂不也四世孫開泰間爲本班郎君有捕盜功樞密使蕭朴薦之遷率府率太平中同知南院宣徽事累遷彰聖軍節度使十六年知興中府以獄空聞十八年伐夏攝西南面招討使十九年夏人侵金肅軍敗之斬首萬餘級加右武衛上將軍時近邊羣牧數被寇掠遷倒塌嶺都監以治之桴鼓不鳴二十年知金肅軍事宰相趙惟節總領邊城橋道

遼史卷九十一
死傷
區
芻粟請貳帝命僕里篤副之以稱職聞清寧初歷長寧
匡義二軍節度使致仕咸雍間卒子阿固質終倒塌嶺
都監

論曰韓八因帝微行才始見售及任以事落落知大體
不負上之知矣唐古朮哲經略西北邊勸農積粟訓練
士卒敵人不敢犯瑛以忠直見稱於上僕里篤以幹敏
爲宰相佐在鎮俱以獄空聞之數人者豈特甲冑之士
亦李牧程不識之亞歟

遼史卷九十一

遼史卷九十二

元中書右丞相總裁脫脫等修

列傳第二十二

蕭奪刺 蕭普達 耶律侯哂 耶律古昱

耶律獨顛 蕭韓家 蕭烏野

蕭奪刺字接懶遙輦注可汗宮人祖涅魯古北院樞密副使父撒抹字胡獨堇重熙初補祇候郎君累遷北面林牙十九年從耶律宜新蕭蒲奴伐夏至蕭惠敗績之地獲偵候者知人煙聚落多國人陷沒而不能還者盡俘以歸拜大父敞穩知山北道邊境事清寧初歷西南

苗西北路招討使加同中書門下平章事卒奪刺體貌
豐偉騎射絕人由祇候郎君陞漢人行宮副部署後爲
烏古敵烈統軍使克敵有功加龍虎衛上將軍授西北
路招討使因陳北邊利害請以本路諸部與倒塌嶺統
軍司連兵屯戍再表不納改東北路統軍使乾統元年
以久練邊事復爲西北路招討使北阻卜耶覲刮率鄰
部來侵奪刺逆擊追奔數十里二年乘耶覲刮無備以
輕騎襲之獲馬萬五千疋牛羊稱是先是有詔方面無
事招討副統軍都監內一員入覲是時同僚皆闕奪刺
以軍事付幕吏而朝坐是免官改西京留守復爲東北

路統軍卒于官

蕭普達字彈隱統和初爲南院承旨開泰六年出爲烏古部節度使七年敵烈部叛討平之徙烏古敵烈部都監遣敵烈騎卒取北阻卜名馬以獻賜詔褒獎重熙初改烏古敵烈部都詳穩討諸蕃有功普達深練邊事能以悅使人有所俘獲悉散麾下由是大得衆心歷西南面招討使党項叛入西夏普達討之中流矢歿于陣帝聞惜之賻贈加厚

耶律侯哂字禿寧北院夷离堇蒲古只之後祖查只北院大王父忽古黃皮室詳穩侯哂初爲西南巡邊官以

廉潔稱累遷南京統軍使尋爲北院大王重熙十一年
党項部人多叛入西夏侯哂受詔巡西邊沿河要地多
建城堡以鎮之徙東京留守十三年與知府蕭歐里斯
討蒲盧毛朶部有功加兼侍中致仕卒

耶律古昱字磨魯堇北院林牙突呂不四世孫有膂力
工馳射開泰間爲烏古敵烈部都監會部人叛從樞密
使耶律世良討平之以功詔鎮撫西北部教以種樹畜
牧不數年民多富實中京盜起命古昱爲巡邏使悉擒
之上親征渤海將黃皮室軍有破敵功累遷御史中丞
尋授開遠軍節度使徙鎮歸德二十一年改天成軍節

度使卒于官年七十贈同中書門下平章事二子宜新
元沒宜新重熙間從蕭惠討西夏惠敗績宜新一軍獨
全拜北院大王元沒太康三年爲漢人行宮副部署乙
辛誣害太子詞連元沒帝釋之是秋乙辛復奏與蕭楊
九私議宮壺事被害乾統間贈同中書門下平章事

耶律獨攬字胡獨董太師古昱之子重熙初爲左護衛
將禁兵從伐夏有功授十二行紕司徒再舉伐夏獨攬
括山西諸郡馬還遷拽刺詳穩西南未平命獨攬同知
金肅軍事夏人來侵擊敗之進涅刺奧隗部節度使清
寧元年召爲皇太后左護衛太保四年改寧遠軍節度

使東路饑奏振之歷五國烏古部遼興軍三鎮節度使
四捷軍詳穩太康元年卒追贈同中書門下平章事子
阿思有傳

蕭韓家國舅之族姓端簡謹愿動循禮法清寧中爲護
衛太保太康二年遷知北院樞密副使三年經畫西南
邊天池舊塹立堡砦正疆界刻石而還爲漢人行宮都
部署是年秋獵墮馬卒

蕭烏野字草隱其先出興聖宮分觀察使塔里直之孫
也性孝悌尚禮法雅爲鄉黨所稱重熙中補護衛興宗
見其勤恪遷護衛太保佐耶律仁先平重元亂以功加

團練使時敵烈部數爲鄰部侵擾民多困弊命烏野爲敵烈部節度使恤困窮省徭役不數月部人以安尋以母老歸養于家母亡尤極哀毀服闋歷官興聖延慶二宮使卒

論曰烏古敵烈大部也奪刺爲統軍克敵有功普達居詳穩悅以使人西北重鎮也侯哂巡邊以廉稱古昱鎮撫而民富獨擯駐金肅而夏人不敢東獵噫部人內附方面以寧雖朝廷處置得宜而諸將之力抑亦何可少哉

遼史卷九十二

遼史卷九十三

元中書右丞相總裁脫脫等修

列傳第二十三

蕭

惠

慈氏奴

蕭迂魯

鐸盧幹

蕭圖玉

耶律鐸軫

蕭惠字伯仁小字脫古思淳欽皇后弟阿古只五世孫
初以中宮親爲國舅詳穩從伯父排押征高麗至奴古
達北嶺高麗阻險以拒惠力戰破之及攻開京以軍律
整肅聞授契丹行宮都部署開泰二年改南京統軍使
未幾爲右夷離畢加同中書門下平章事朝議以遼東

重地非勲戚不能鎮撫乃命惠知東京留守事改西北路招討使封魏國公太平六年討回鶻阿薩蘭部徵兵諸路獨阻卜酋長直刺後期立斬以徇進至甘州攻圍三日不克而還時直刺之子聚兵來襲阻卜酋長烏八密以告惠未之信會西阻卜叛襲三克軍都監涅魯古突舉部節度使諧里阿不呂等將兵三千來救遇敵于可敦城西南諧理阿不呂戰歿士卒潰散惠倉卒列陣敵出不意攻我營衆請乘時奮擊惠以我軍疲敝未可用弗聽烏八請以夜斫營惠又不許阻卜歸惠乃設伏兵擊之前鋒始交敵敗走惠爲招討累年屢遭侵掠士

馬疲困七年左遷南京侍衛親軍馬步軍都指揮使尋
遷南京統軍使興宗卽位知興中府歷順義軍節度使
東京留守西南面招討使加開府儀同三司檢校太師
兼侍中封鄭王賜推誠協謀竭節功臣重熙六年復爲
契丹行宮都部署加守太師徙王趙拜南院樞密使更
王齊是時帝欲一天下謀取三關集羣臣議惠曰兩國
疆弱聖慮所悉宋人西征有年師老民疲陛下親率六
軍臨之其勝必矣蕭孝穆曰我先朝與宋和好無罪伐
之其曲在我况勝敗未可逆料願陛下熟察帝從惠言
迺遣使索宋十城會諸軍于燕惠與太弟帥師壓宋境

宋人重失十城增歲幣請和惠以首事功進王韓十二年兼北府宰相同知元帥府事又爲北樞密使十三年夏國李元昊誘山南党項諸部帝親征元昊懼請降惠曰元昊忘奕世恩萌姦計車駕親臨不盡歸所掠天誘其衷使彼來迎天與不圖後悔何及帝從之詰旦進軍夏人列拒馬于河西蔽盾以立惠擊敗之元昊走惠麾先鋒及右翼邀之夏人千餘潰圍出我師逆擊大風忽起飛沙眯目軍亂夏人乘之蹂踐而死者不可勝計詔班師十七年尚弟姊秦晉國長公主拜駙馬都尉明年帝復征夏國惠自河南進戰艦糧船綿亘又百里旣入

敵境偵候不還鎧甲載于車軍士不得乘馬諸將咸請
備不虞惠曰諒祚必自迎車駕何暇及我無故設備徒
自弊耳數日我軍未營候者報夏師至惠方詰妄言罪
諒祚軍從阪而下惠與麾下不及甲而走追者射惠幾
不免軍士死傷尤衆師還以惠子慈氏奴歿于陣詔釋
其罪十九年請老詔賜肩輿入朝策杖上殿辭章再上
乃許之封魏國王詔冬夏赴行在參決疑議既歸遣賜
湯藥及他賜賚不絕每生日輒賜詩以示尊寵清寧二
年薨年七十四遺命家人薄葬計聞輟朝三日惠性寬
厚自奉儉薄與宗使惠恣取珍物惠曰臣以戚屬據要

地祿足養廉奴婢千餘不爲闕乏陛下猶有所賜貧於臣者何以待之帝以爲然故爲將雖數敗衄不之罪也弟虛列武定軍節度使二子慈氏奴兀古匿兀古匿終北府宰相慈氏奴字寧隱太平初以戚屬補祗候郎君上愛其勤慎陞開撒狻加右監門衛上將軍西邊有警授西北路招討都監領保大軍節度使政濟恩威諸部悅附入爲殿前副點檢歷烏古敵烈部詳穩征李諒祚爲統軍都監與西北路招討使敵魯古率蕃部諸軍由北路趨涼州獲諒祚親屬夏人扼險以拒慈氏奴中流矢卒年五十一贈中書門下平章事

蕭迂魯字胡突董五院部人父約質歷官節度使迂魯重熙間爲牌印郎君清寧九年國家旣平重元之亂其黨郭九等亡詔迂魯追捕獲之遷護衛太保咸雍元年使宋議邊事稱旨知殿前副點檢事五年阻卜叛爲行軍都監擊敗之俘獲甚衆初軍出止給五月糧過期糧乏士卒往往叛歸迂魯坐失計免官降戍西北部未行會北部兵起迂魯將烏古敵烈兵擊敗之每戰以身先繇是釋前罪命總知烏古敵烈部九年敵烈叛都監耶律獨迭以兵少不戰屯臚朐河敵烈合邊人掠居民迂魯率精騎四百力戰敗之盡獲其輜重繼聞酋長合朮

三千餘騎掠附近部落縱兵躡其後連戰二日斬數千級盡得被掠人畜而還值敵烈黨五百餘騎劫捕鷹尸逆擊走之俘斬甚衆自是敵烈勢沮時敵烈方爲邊患而阻卜相繼寇掠邊人以故疲弊朝廷以地遠不能時益援軍而使疆圉帖然者皆迂魯力也帝嘉其功拜左皮室詳穩會宋求天池之地詔迂魯兼統兩皮室軍屯太牢古山以備之太康初阻卜叛遷西北招討都監從都統耶律趙三征討有功改南京統軍都監黃皮室詳穩未幾遷東北路統軍都監卒弟鐸盧幹

鐸盧幹字撒板幼驚悟異常兒三歲失母哭盡哀見者

傷之及長魁偉沉毅好學善屬文有才幹年三十始仕
爲朝野推重給事北院知聖旨事太康二年乙辛再入
樞府鐸盧幹素與蕭巖壽善誣以罪謫戍西北部坐皇
太子事特恩減死仍錮終身在戍十餘年太子事稍直
始得歸鄉里屏居謝人事一日臨流聞雉鳴三復孔子
時哉語作古詩三章見志當時名士稱其高情雅韻不
減古人壽隆六年卒年六十一
乾統初贈彰義軍節度使

蕭圖玉字兀衍北府宰相海璿之子統和初皇太后稱
制以戚屬入侍尋爲烏古部都監討速母縷等部有功

遷烏古部節度使十九年總領西北路軍事後以本路
兵伐甘州降其酋長牙懶旣而牙懶復叛命討之克肅
州盡遷其民于土隗口故城師還詔尚金鄉公主拜駙
馬都尉加同政事令門下平章事上言曰阻卜今已服
化宜各分部治以節度使上從之自後節度使徃徃非
材部民怨而思叛開泰元年七月石烈太師阿里底殺
其節度使西奔窩魯朶城蓋古所謂龍庭單于城也已
而阻卜復叛圍圖玉于可敦城勢甚張圖玉使諸軍齊
射却之屯于窩魯朶城明年北院樞密使耶律化哥引
兵來救圖玉遣人誘諸部皆降帝以圖玉始雖失計後

得人心釋之仍領諸部請益軍詔讓之曰叛者旣服兵
安用益且前日之役死傷甚衆若從汝謀邊事何時而
息遂止會公主坐殺家婢降封郡主圖玉罷使相尋起
爲烏古敵烈部詳穩以老代還卒子雙古南京統軍使
孫訛篤幹尚三韓郡王合魯之女骨浴公主終烏古敵
烈部統軍使以善戰名于世

耶律鐸軫字敵輦積慶宮人仕統和間性疎簡不顧小
節人初以是短之後侵宋分總羸師以從及戰取緋帛
被介冑以自標顯馳突出入敵陣格殺甚衆太后望見
喜名謂之曰卿戮力如此何患不濟厚賞之由是多以

軍事屬任俄授東北詳穩開泰二年進討阻卜克之重
熙間歷東路統軍使天德軍節度使十七年城西邊命
鐸軫相地及造戰艦因成樓船百三十艘上置兵下立
馬規制堅壯稱旨及西征詔鐸軫率兵由別道進會于
河濱敵兵阻河而陣帝御戰艦絕河擊之大捷而歸親
賜卮酒仍問所欲鐸軫對曰臣幸被聖恩得効駑力萬
死不能報國又將何求帝愈重之手書鐸軫衣裾曰勤
國忠君舉世無雙卒于官年七十子低烈歷觀察節度
使

論曰劫遼之謀復三關也蕭惠贊伐宋之舉而宋人增

幣請和狃於一勝移師西夏而勇智俱廢敗潰隨之豈
非貪小利迷遠圖而然况所得不償所亡利果安在哉
同時諸將撫綏邊圉若迂魯忠勤不伐鐸軫高情雅韻
鐸盧幹雖廉不逮蕭惠而無邀功啓釁之罪亦庶乎君
子之風矣

遼史卷九十三

遼史卷九十四

元中書右丞相總裁脫脫等修

列傳第二十四

耶律化哥

耶律斡臘

耶律速撒

蕭阿魯帶

耶律那也

耶律何魯掃古

耶律世良

耶律化哥字弘隱孟父楚國王之後善騎射乾亨初爲北院林牙統和四年南侵宋化哥擒謀者知敵由海路來襲卽先據平州要地事平拜上京留守遷北院大王十六年復侵宋爲先鋒破敵于遂城以功遷南院大王

尋改北院樞密使開泰元年伐阻卜阻卜棄輜重遁走
俘獲甚多帝嘉之封幽王後邊吏奏自化哥還闕糧乏
馬弱勢不可守上復遣化哥經略西境化哥與邊將深
入聞蕃部逆命居翼只水化哥徐以兵進敵望風奔潰
獲羊馬及輜重路由白拔烈遇阿薩蘭回鶻掠之都監
裏里繼至謂化哥曰君誤矣此部實効順者化哥悉還
所俘諸蕃由此不附上使案之削王爵以侍中遙領大
同軍節度使卒

耶律斡臘字斯寧奚迭刺部人趨捷有力善騎射保寧
初補護衛車駕獵頡山適豪猪伏叢莽帝射中猪突出

御者托滿捨轡而避廐人鶴骨翼之幹臘復射而斃帝
嘉賞及獵赤山適奔鹿奮角突前路隘不容避垂犯蹕
幹臘以身當之鹿觸而顛帝謂曰朕因獵兩瀕于危賴
卿以免始見爾心遷護衛太保從樞密使耶律糾軫破
宋將楊繼業軍于山西統和十三年秋爲行軍都監從
都部署奚王和朔奴伐兀惹烏昭度數月至其城昭度
請降和朔奴利其俘掠令四面急攻昭度率衆死守隨
方捍禦依埤現虛構戰棚誘我軍登陴俄撤枝柱登者
盡覆和朔奴知不能下欲退蕭恒德謂師久無功何以
藉口若深入大涼猶勝空返幹臘曰深入恐所得不償

通鑑卷九十四 齊傳
所損恒德不從略地東南循高麗北鄙還道遠糧絕人馬多死詔奪諸將官惟幹臘以前議得免尋加同政事門下平章事爲東京留守開泰中卒

耶律速撒字阿敏性忠直簡毅練武事應歷初爲侍從累遷突呂不部節度使歷霸濟祥順聖五州都總管俄爲敦睦宮太師保寧三年改九部都詳穩四年伐党項屢立戰功手詔勞之統和初皇太后稱制西邊甫定速撒務安集諸蕃利害輒具以聞太后益信任之凡臨戎與士卒同甘苦所獲均賜將校賞順討逆威信大振在邊二十年卒

蕭阿魯帶字乙辛隱烏隗部人父女古仕至糺詳隱阿魯帶少習騎射曉兵法清寧間始仕累遷本部司徒改烏古敵烈統軍都監大安七年遷山北副部署九年達理得拔思母二部來侵率兵擊却之達理得復劫牛羊去阿魯帶引兵追及盡獲所掠斬渠帥數人是冬達理得等以三百餘人梗邊復戰却之斬首二百餘級加金吾衛上將軍封蘭陵縣公壽隆元年第功加同中書門下平章事進爵郡公改西北路招討使乾統三年坐留宋俘當遣還者爲奴免官後被徵以老疾致仕卒

耶律那也字移斯輦夷离堇蒲古只之後父幹常爲北

剋從伐夏戰歿季父趙三始爲宿直官累遷至北面林
牙咸雍四年拜北院大王改西南面招討使太康中西
北諸部擾邊議欲往討帝以爲非趙三不可遂拜西北
路招討使兼行軍都統平之以功復爲北院大王那也
敦厚才敏上以其父幹死王事九歲加諸衛小將軍爲
題里司徒尋召爲宿直官太康三年爲遙輦剋大安九
年爲倒塌嶺節度使明年冬以北阻卜長磨古斯叛與
招討都監耶律胡呂率精騎二千往討破之那也薦胡
呂爲漢人行宮副部署壽隆元年復討達理拔思等有
功賜詔褒美改烏古敵烈部統軍使邊境以寧部民乞

留詔許再任乾統六年拜中京留守改北院大王薨那也爲人廉介長于理民每有闕訟親覈曲直不尚威嚴常曰凡治人本欲分別是非何事迫脅以立名故所至以惠化稱

耶律何魯掃古字烏古鄰孟父房之後重熙末補祗候郎君清寧初加安州團練使太康中歷懷德軍節度使奚六部禿里太尉詔與樞密官措畫東北邊事改左護衛太保侍上言多率易察無他腸以故上優貸之八年知西北路招討使事時邊部耶都刮等來侵何魯掃古誘北阻卜酋豪磨古斯攻之俘獲甚衆以功加左僕射

通志卷九十四 列傳
四
復討耶覲刮等誤擊磨古斯北阻卜由是叛命遣都監
張九討之不克二室韋與六院部特滿羣牧宮分等軍
俱陷于敵何魯掃古不以實聞坐是削官決以大杖壽
隆間累遷惕隱兼侍中賜保節功臣道宗崩與宰相耶
律儼總山陵事乾統中致仕卒

耶律世良小字幹六院部人才敏給練達國朝典故及
世譜上書與族弟敵烈爭嫡庶帝始識之時北院樞密
使韓德讓病帝問孰可代卿德讓曰世良可北院大王
耶律室魯復問北院之選德讓曰無出世良統和末爲
北院大王開泰初因大冊禮加檢校太尉同政事門下

平章事時邊部拒命詔北院樞密使耶律化哥將兵以世良爲都監往禦之明年化哥還將罷兵世良上書曰化哥以爲無事而還不思師老糧乏敵人已去焉能久守若益兵可克也帝卽命化哥益兵與世良追之至安真河大破而還自是邊境以寧以功王岐拜北院樞密使三年命選馬馳于烏古部會敵烈部人夷刺殺其酋長稍瓦而叛鄰部皆應攻陷巨母古城世良率兵壓境遣人招之降數部各復故地四年伐高麗爲副部署都統劉慎行逗遛失期執還京師世良獨進兵明年至北都護府破追兵于郭州以暴疾卒

論曰大之懷小也以德制之也以威德不足懷威不足制而欲服人也難矣化哥利俘獲而諸蕃不附何魯掃古誤擊磨古斯而阻卜叛命是皆喜於一旦之功而不圖後日之患庸何議焉若幹臘之戒深入速撒之務安集亦鐵中之錚錚者邪

遼史卷九十四

遼史卷九十五

元中書右丞相總裁脫脫等修

列傳第二十五

耶律弘古

耶律馬六

蕭滴冽

耶律適祿

耶律陳家奴

耶律特麼

耶律仙童

蕭素颯

耶律大悲奴

耶律弘古字胡篤堇樞密使化哥之弟統和間累遷順義軍節度使入爲北面林牙太平元年加同政事門下平章事出爲彰國軍節度使兼山北道兵馬都部署徙武定軍節度使拜惕隱六年討阻卜有功聖宗嘗刺臂

通鑑卷九十五 齊傳
血與弘古盟爲友禮遇尤異拜南府宰相改上京留守
重熙六年遷南院大王御製誥辭以寵之十三年加于
越帝憫其勞復授武定軍節度使卒訃聞上哭曰惜哉
善人喪至親臨奠焉

耶律馬六字揚隱孟父楚國王之後性寬和善諧謹親
朋會遇一坐盡傾恬于榮利與耶律弘古爲刺血友弘
古爲惕隱薦補宿直官重熙初遷旗鼓拽刺詳穩爲人
畏慎容物或有面相陵折者恬然若弗聞不臧否世務
以故上益親狎三年遷崇德宮使爲惕隱御製誥辭以
褒之拜北院宣徽使寵遇過幸輔帝常以兄呼之改遼

興軍節度使卒年七十子奴古達終南京宣徽使

蕭滴列字國寧遙輦鮮質可汗宮人重熙初遙攝鎮國軍節度使六年奉詔使宋傷足而跛不告遂行帝怒及還決以大杖降同簽南京留守事遙授靜江軍節度使歷羣牧都林牙畧遷右夷離畢以才幹見任使會車駕西征元昊乞降帝以前後反覆遣滴列往覘誠否因爲元昊陳述禍福聽命乃還拜北院樞密副使出爲中京留守十九年改西京留守卒

耶律適祿字撒懶清寧初爲本班郎中稍遷宿直官乾統中從伐阻卜有功加奉宸歷護衛太保改弘義宮副

使時上京梟賊趙鍾哥跋扈自肆適祿擒之加泰州觀察使爲達魯斡部節度使天慶中知興中府加金吾衛上將軍爲盜所殺

耶律陳家奴字綿辛懿祖弟葛刺之八世孫重熙中補牌印郎君坐直日不至降本班會帝獵陳家奴逐鹿圍內鞭之二百時耶律仁先薦陳家奴捷比海東青鶻授御蓋郎君歷鷹坊尚廐四方館副使改徒魯古皮室詳穩會太后生辰進詩獻馴鹿太后嘉獎賜珠二琲雜綵二百段兄撒鉢卒陳家奴聞訃不告而去帝怒鞭之清寧初累遷右夷離畢適帝與燕國王射鹿俱中王時

年九歲帝悅陳家奴應制進詩帝喜解衣以賜後皇太子廢帝疑陳家奴黨附罷之時西北諸部寇邊以陳家奴爲烏古部節度使行軍都監賜甲一屬馬二疋討諸部擒其酋送于朝偵候者見馬蹤意寇至陳家奴遣報元帥耶律愛奴視之曰此野馬也將出獵賊至愛奴戰歿有司詰案陳家奴不伏詔釋之由是感激每事竭力後諸部復來侵陳家奴率兵三往皆克邊境遂寧以老告歸不從道宗崩爲山陵使致仕年八十卒

耶律特麼季父房之後重熙間爲北剋累遷六部禿里太尉大安四年爲倒塌嶺節度使頃之爲禁軍都監是

冬討磨古斯斬首二千餘級十年復討之既捷授南院宣徽使壽隆元年爲北院大王四年知黃龍府事薨

耶律仙童仲父房之後重熙初爲宿直官累遷惕隱都監以寬厚稱蒲奴里叛仙童爲五國節度使率師討之擒其帥陶得里又擊烏隗叛降其衆改彰國軍節度使拜北院大王清寧二年知黃龍府事遷侍衛親軍馬步軍都指揮歷忠順武定二軍節度使致仕封蔣國公咸雍初徙封許國卒

蕭素颯字特免五院部人重熙間始仕累遷北院承旨彰愍宮使清寧初歷左皮室詳穩右夷離畢咸雍五年

剖阿里部叛素颯討降之率其酋長來朝帝嘉其功徙北院林牙改南院副部署卒子謀魯幹字回璉初補夷离畢郎君遷文班太保太康中改南京統軍使爲右夷离畢與樞密使耶律阿思論事不合見忌出爲馬羣太保北部來侵謀魯幹破之以功遷同知烏古敵烈統軍仍許便宜行事後以讒毀降領西北路戍軍復爲馬羣太保卒

耶律大悲奴字休堅王子班聶里古之後太康中歷永興建昌宮使右皮室詳穩會阻卜叛奉詔招降之壽隆二年拜殿前都點檢乾統初歷上京留守惕隱復爲都

點檢改西南面招討使請老不許天慶中留守上京領
北南樞密院點檢中丞諸司等事以彰國軍節度使致
仕卒大悲奴舉止馴雅好禮儀爲時人所稱

論曰遼自神冊而降席富疆之勢內修法度外事征伐
一時將帥震揚威靈風行電掃討西夏征党項破阻卜
平敵烈諸部震懾聞鞶鼓而膽落股弁斯可謂雄武之
國矣其戰勝攻取必有奇謀秘計神變莫測者將前史
所載不足以發之邪抑天之所授衆莫與爭而能然耶
雖然兵者凶器可戢面不可玩爭者末節可遏而不可
名此黃石公所謂柔能制剛弱能制彊也又況乎仁者

之無敵哉遼之君臣智足守此金人果能乘其敝而躡
其後乎是以於耶律弘古輩諸將不能無慨然也

遼史卷九十五

遼史卷九十六

元中書右丞相總裁脫脫等修

列傳第二十六

耶律仁先

撻不也

耶律良

蕭韓家奴

蕭德

蕭惟信

蕭樂音奴

耶律敵烈

姚景行

耶律阿思

耶律仁先字紉鄰小字杳刺孟父房之後父瑰引南府宰相封燕王仁先魁偉爽秀有智略重熙三年補護衛帝與論政才之仁先以不世遇言無所隱授宿直將軍累遷殿前副點檢改鶴刺唐古部節度使俄召爲北面

林牙十一年陞北院樞密副使時宋請增歲幣銀絹以償十縣地產仁先與劉六符使宋仍議書貢宋難之仁先曰曩者石晉報德本朝割地以獻周人攘而取之是非利害灼然可見宋無辭以對乃定議增銀絹十萬兩匹仍稱貢既還同知南京留守事十三年伐夏留仁先鎮邊未幾召爲契丹行宮都部署奏復王子班郎君及諸宮雜役十六年遷北院大王奏今兩院戶口殷庶乞免他部助役從之十八年再舉伐夏仁先與皇太弟重元爲前鋒蕭惠失利于河南帝猶欲進兵仁先力諫乃止後知北院樞密使遷東京留守女直恃險侵掠不止

仁先乞開山通道以控制之邊民安業封吳王清寧初
爲南院樞密使以耶律化哥譖出爲南京兵馬副元帥
守太尉更王隋六年復爲北院大王民歡迎數百里如
見父兄時北南院樞密官涅魯古蕭胡覩等忌之請以
仁先爲西北路招討使耶律乙辛奏曰仁先舊臣德冠
一時不宜補外復拜南院樞密使更王許七月上獵太
子山耶律良奏重元謀逆帝召仁先語之仁先曰此曹
兇狠臣固疑之久矣帝趣仁先捕之仁先出且曰陛下
宜謹爲之備未及介馬重元犯帷宮帝欲幸北南院仁
先曰陛下若舍扈從而行賊必躡其後且南北大王心

未可知仁先子撻不也曰聖意豈可違乎仁先怒擊其首帝悟悉委仁先以討賊事乃環車爲營拆行馬作兵仗率官屬近侍三十餘騎陣抵柅外及交戰賊衆多降涅魯古中矢墮馬擒之重元被傷而退仁先以五院部蕭塔刺所居最近亟召之分遣人集諸軍黎明重元率奚人二千犯行宮蕭塔刺兵適至仁先料賊勢不能久埃其氣沮攻之乃背營而陣乘便奮擊賊衆奔潰追殺二十餘里重元與數騎遁去帝執仁先手曰平亂皆卿之功也加尚父進封宋王爲北院樞密使親製文以褒之詔畫灤河戰圖以旌其功咸雍元年加于越改封遼

王與耶律乙辛共知北院樞密事乙辛恃寵不法仁先抑之由是見忌出爲南京留守改王晉恤孤惇禁姦慝宋聞風震服議者以爲自于越休哥之後惟仁先一人而已阻卜塔里干叛命仁先爲西北路招討使錫鷹紐印及劔上諭曰卿去朝廷遠每俟奏行恐失機會可便宜從事仁先嚴斥埃扼敵衝懷柔服從庶事整飭塔里干復來寇仁先逆擊追殺八十餘里大軍繼至又敗之別部把里斯禿沒等來救見其屢挫不敢戰而降北邊遂安八年卒年六十遺命家人薄葬弟義先信先俱有傳子撻不也

撻不也字胡獨堇清寧二年補祗候郎君累遷永興宮使以平重元之亂遙授忠正軍節度使賜定亂功臣同知殿前點檢司事歷高陽臨海二軍節度使左皮室詳穩太康六年授西北路招討使率諸部酋長入朝加兼侍中自蕭敵祿爲招討之後朝廷務姑息多擇柔愿者用之諸部漸至跋扈撻不也含容尤甚邊防益廢尋改西南面招討使阻卜酋長磨古斯來侵西北路招討使何魯掃古戰不利詔撻不也代之磨古斯之爲酋長由撻不也所薦至是遣人誘致之磨古斯始降撻不也逆于鎮州西南沙磧間禁士卒無得妄動敵至裨將耶律

綰斯徐烈見其勢銳不及戰而走遂被害年五十八贈
侍中諡曰貞憫撻不也少謹愿後爲族發婦所惑出其
妻終以無子人以此譏之

耶律良字習撚小字蘇著帳郎君之後生於乾州讀書
醫巫閭山學旣博將入南山肄業友人止之曰爾無僕
御驅馳千里縱聞見過人年亦垂暮今若卽仕已有餘
地良曰窮通命也非爾所知不聽留數年而歸重熙中
補寢殿小底尋爲燕趙國王近侍以家貧詔乘廐馬遷
修起居注會獵秋山良進秋游賦上嘉之清寧中上幸
鴨子河作捕魚賦由是寵遇稍隆遷知制誥兼知部署

司事奏請編御製詩文目曰清寧集上命良詩爲慶會
集親製其序頌之爲敦睦宮使兼權知皇太后宮諸局
事良聞重元與子涅魯古謀亂以帝篤於親愛不敢遽
奏密言於皇太后太后託疾召帝白其事帝謂良曰汝
欲間我骨肉耶良奏曰臣若妄言甘伏斧鑕陛下不早
備恐墮賊計如召涅魯古不來可卜其事帝從其言使
者及門涅魯古意欲害之羈於帳下使者以佩刀斷帟
而出馳至行宮以狀聞帝始信亂平以功遷漢人行宮
都部署咸雍初同知南院樞密使事爲惕隱出知中京
留守事未幾卒帝嗟悼遣重臣賻祭給葬具追封遼西

郡王諡曰忠成

蕭韓家奴字括寧奚長渤魯恩之後性孝友太平中補
祇候郎君累遷敦睦宮使伐夏爲左翼都監遷北面林
牙俄爲南院副部署賜玉帶改奚六部大王治有聲清
寧初封韓國公歷南京統軍使北院宣徽使封蘭陵郡
王九年上獵太子山聞重元亂馳詣行在帝倉卒欲避
于北南大王院與耶律仁先執轡固諫乃止明日重元
復誘奚獵夫來韓家奴獨出諭之曰汝曹去順效逆徒
取族滅何若悔過轉禍爲福獵夫投仗首服以功遷殿
前都點檢封荆王賜資忠保義奉國竭貞平亂功臣咸

通鑑卷九十一 五
五
雍二年遷西南面招討使太康初徙王吳賜白海東青
鵲皇太子爲乙辛所構幽于上京韓家奴上書力言其
寃不報四年復爲西南面招討使例削一字王爵改王
蘭陵薨子楊九終右祇候郎君班詳穩贈同中書門下
平章事

蕭德字特末隱楮特部人性和易篤學好禮法太平中
領牌印直宿累遷北院樞密副使敷奏詳明多稱上旨
詔與林牙耶律庶成修律令改契丹行宮都部署賜宮
戶十有五清寧元年遷同知北院樞密使封魯國公上
以德爲先朝眷遇拜南府宰相五年轉南京統軍使九

年復爲南府宰相重元之亂推鋒力戰斬涅魯古首以
獻論功封漢王咸雍初以告老歸優詔不許久之加尚
父致仕卒年七十二

蕭惟信字耶寧楮特部人五世祖霞賴南府宰相曾祖
烏古中書令祖阿古只知平州父高八多智數博覽古
今開泰初爲北院承旨稍遷右夷离畢以幹敏稱拜南
府宰相累遷倒塌嶺節度使知興中府復爲右夷离畢
陵青誘衆作亂事覺高八按之止誅首惡餘並釋之歸
奏稱旨惟信資沉毅篤志于學能辨論重熙初始仕累
遷左中丞十五年徙燕趙國王傳帝諭之曰燕趙左右

多面諛不聞忠言浸以成性汝當以道規誨使知君父之義有不可處王邸者以名聞惟信輔導以禮十七年遷北院樞密副使坐事免官尋復職兼北面林牙清寧九年重元作亂犯灤河行宮惟信從耶律仁先破之賜竭忠定亂功臣歷南京留守左右夷離畢復爲北院樞密副使太康中以老乞骸骨不聽樞密使耶律乙辛譖廢太子中外知其寃無敢言者惟信數廷爭不得復告老加守司徒卒

蕭樂音奴字婆丹奚六部敞穩突呂不六世孫父拔刺二三歲居父母喪毀瘠過甚養于家奴奚列阿不重熙初

興宗獵奚山過拔刺所居奚列阿不言于近臣拔刺得見上年甫十歲氣象如成人帝悅之錫賚甚厚旣長有遠志不樂仕進隱于奚王嶺之插合谷上以其名家又有時譽就拜舍利軍詳穩樂音奴貌偉言辨通遼漢文字善騎射擊鞠所交皆一時名士年四十始爲護衛平重元之亂以功遷護衛太保改本部南尅俄爲旗鼓拽刺詳穩監障海東青鶻獲白花者十三賜楫柁犀并玉吐鶻拜五蕃部節度使卒于陽阿有傳

耶律敵烈字撒懶採訪使吼五世孫寬厚好學工文詞重熙末補牌印郎君兼知起居注清寧元年稍遷同知

永州事禁盜有功改北面林牙承旨九年重元作亂敵
烈赴援力戰平之遙授臨海軍節度使十年徙武安州
觀察使咸雍五年累遷長寧宮使檢括戶部司乾州錢
帛逋負立出納經畫法公私便之太康四年爲南院大
王秩滿部民請留同知南京留守事有疾上命乘傳赴
闕遣太醫視之遷上京大安中改塌母城節度使以疾
致仕加兼侍中賜一品俸八年卒

姚景行始名景禧祖漢英本周將應歷初來聘用敵國
禮帝怒留之隸漢人宮分及景行旣貴始出籍貫興中
縣景行博學重熙五年擢進士乙科爲將作監改燕趙

國王教授不數年至翰林學士樞密副使叅知政事性敦厚廉直人望歸之道宗卽位多被顧問爲北府宰相九年秋告歸道聞重元亂收集行旅得三百餘騎勤王比至賊已平帝嘉其忠賜以逆人財產咸雍元年出爲武定軍節度使明年驛召拜南院樞密使上從容問治道引入內殿出御書及太子書示之賜什器車仗帝有意伐宋召景行問曰宋人好生邊事如何對曰白聖宗皇帝以威德懷遠宋修職貢迨今幾六十年若以細故用兵恐違先帝成約上然其言而止致仕不踰月復舊職丁家艱起復兼中書令上問古今儒士優劣占對稱

旨知興中府改朔方軍節度使太康初徙鎮遼興以上
京多滯獄命爲留守不數月以獄空聞累乞致政不從
復請許之加守太師卒遣使弔祭追封柳城郡王謚文
憲壽隆五年詔爲立祠

耶律阿思字撒班清寧初補祗候郎君以善射掌獵事
進渤海近侍詳穩重元之亂與護衛蘇射殺涅魯古賜
號靖亂功臣徙契丹行宮都部署大安初爲北院大王
封漆水郡王十一年爲北院樞密使監修國史道宗崩
受顧命加于越錄乙辛黨人罪重者當籍其家阿思受
賂多所寬貰蕭合魯嘗言當修邊備阿思力沮其事或

譏其以金賣國後以風疾失音致仕加尚父封趙王薨
年八十追封齊國王

論曰灤河之變重元擁兵行幄微仁先等道宗其危乎
當其止幸北南院召塔刺兵以靖大難功宜居首良以
反謀白太后韓家奴以逆順降奚人德與阿思殺涅魯
古皆有討賊之力焉仁先齊名休哥勲德兼備此其一
節歟

遼史卷九十六